

穀論訥

齋 谿

對

奏 奏

疏錄疏





訥 谿 奏 疏

周 怡 撰

叢書集成初編

(補印本)

納谿奏疏及其他二種

一九三九年十二月初版

一九六〇年一月補印

商務印書館出版

上海印刷學校印刷

四庫全書提要

訥谿奏疏一卷。明周怡撰。怡字順之。號都峯。改號訥谿。太平人。嘉靖戊戌進士。怡初居吏垣。以言事忤嚴嵩。廷杖。下錦衣獄。三年。世宗感箕仙之言。得與楊爵、劉魁同出獄。未幾以熊浹劾箕仙誣妄。激世宗怒。復逮入獄。又二年。始得釋。隆慶初。召爲太常寺少卿。又上疏忤中官。外調山東按察司僉事。稍遷司業。仍爲太常寺少卿以卒。平生觸犯權倖。至再至三。困踣顛連。僅存一息。而其志百折不改。勁直忠亮。卓然爲一代完人。是集爲其弟恪所編。凡吏科奏疏十一篇。太常奏疏二篇。雖卷帙無多。而生氣凜然。猶足以見其梗概也。卷末乞休一疏。註曰。李石麓相公不允上。李石麓者。大學士李春芳號也。蓋怡放廢以後。不欲再出。而春芳以穆宗新政。欲獎用直臣。故格之不能上達。然怡訖不得大用。殆亦如郭公之善善歟。

訥谿奏疏

明 周 怡 撰

吏科給事中臣周怡謹題爲督撫大臣罔上不忠乞賜諭責以振風紀事竊惟撫按之臣受天子明命分理一方生民休戚賴以蘇息苟仰思朝廷付託之重一方瞻仰之大則所以惕心飭躬慎官畏法真如負重而涉淵冰寧肯專恣自大廢法徇情自戾官方耶今天下爲朝廷牧赤子專則守令次則藩臬爲撫按者留意賢否欽慎自嚴則下觀而敬畏生賢者勤而貞志彌篤不肖者憚而非念潛消其利濟一方甚大況甄別嚴明孰敢越志近觀某舉劾方面守令二疏臣等竊不自安者數日某以其官則兵部尙書其權則右都御史其責則提督巡撫其地則兩廣實朝廷之遐方邊徼朝廷所以隆其秩位重其權任非以侈大某之身蓋以遠方之民蒙朝廷之德化視畿甸近藩爲杳遠故命之重臣欲其敷宣皇化覃洽海濱如畿甸近藩甚盛意也爲某者肯一念及此其所舉動必不苟且輕易今於兩廣布按二司止舉以市恩獨以一都指揮僉事某劾以藉口兩廣猖獗寇竊東剽西掠日有警傳文德武備不宜偏有輕重今惟舉文劾武重俎豆而輕介冑非所以爲勸豈惟南越之將士憤快今西地多事之日嬰鋒蹈刃則責之以死命而舉賢旌能獨不錄其微長搜瑕索疵獨於此輩深刻臣恐武夫聞之解體難望其臨敵有血戰死綏之志兩廣所轄郡邑寔繁見任守令廢怠官守者寧無數人本官於廣東則

劾雷州府知府葉某某於廣西則劾柳州府知府戴某及查本官及巡按同日報缺官本內柳州府知府戴某已於四月初五日准告致仕本官劾疏發於四月二十日據傳聞之言戴某於四月初五日已前已經離任回籍去訖又查嘉靖二十一年十一月初一日本官報缺官本內雷州府知府葉某某已於本年十月二日丁憂去訖二臣之衰老廢敗亦有年矣一則以去任踰年而始劾之一則以去任踰月而猶劾之無乃以見任者情勢難言假以去任者朦朧塞責苟且欺罔莫此爲大舉刺本以激揚今反以長惡遂姦何可望其廉貪而貞淫耶觀所劾則知所舉多狗情不可以盡信觀舉劾一事則知經略他務多虛應不可以爲賴叨竊大位大祿大權而苟且欺罔如此臣竊爲朝廷不平焉臣據事論事知其無以人事君之忠其諸風聞之言不敢一槩妄瀆聖聽伏惟陛下軫念民瘼不遺遐方勅下吏部都察院參論其素行議擬去留上請宸斷或嚴示戒罰以責晚効仍令該部通行各處撫按以後舉刺不許狗情市恩苟且欺罔有負任使庶官箴有嚴法守不墮而風紀振揚非小補也臣待罪言責義不敢默惟聖明宏納嘉靖二十一年十二月十七日題

吏科給事中臣周怡謹題爲竭瀝血忱懇祈天鑒非常變異詔求直言通行中外痛如修省以答天心罔極仁愛事

臣愚竊謂穹然上覆者天也。隕然下載者地也。巍然首出繼天地而立極者帝也。天地奠位者常也。如日月星辰風雷雲霧海嶽泉石人物之類一失其常則皆謂之變也。人君之位曰天位。祿曰天祿。事曰天工。

語曰天語禮曰天秩典曰天敘命德曰天命討罪曰天討以昭人君即天也不言地者統天之尊也天地之常人君之常也天地之變人君即引以自咎通行警戒大小臣工各勵修省期以復于常也近照欽天監奏稱嘉靖二十二年正月初一日日食不及三分且日未出時候即同不食免行救護奉聖旨是欽此欽遵臣愚竊謂懸象著明莫大乎日月日月之食天變之大者也雖曰少食即同不食臣則以爲與其少虧不如無虧救護可免修省不可無也正月之朔乃歲之首也月之首也日之首也其食在日未出時則又時之首也是可不謂之大變耶臣愚竊窺天象有符聖功聖人慎獨之功戒慎不睹恐懼不聞蓋在幽暗隱微之中人所不知而已所獨知之地戰兢惕厲夙夜憂勤此聖人所以能立無過之地也故曰君子之不可及者其唯人之所不見乎日之未出者食而旋復即不見是圖不遠之復之象也伏觀皇上臨御以來敬天勤民昕夕無間聖德格天切憂勤之心致中和之極宜天地位而萬物育無所變異然古人以天變不作爲天意忘棄以天變之見爲天心仁愛是則天變實所以資聖功也且承君之命而致之民者臣也夙夜匪懈以事一人臣之職也臣職不修則化理自虧天象之變必不虛生近照禮部類奏災異奉聖旨是上天仁愛災異疊見以示警告事關朕躬的知道了便通行各該衙門官員痛加修省盡心職業共圖治理以回天意欽此欽遵臣有以仰見聖心懇切不自滿足誠堯舜其猶病諸文王望道未見之心也視彼遇災而懼側身修行者大不侔矣夫旣通行修省臣似不必贅也而復喋喋者竊以憂勤惕厲而無間者聖心也安常襲故者臣下之積痼也類奏災異乃禮部每年歲終之常例也其不以常行文移了

未完故事之心視之者鮮矣。更望皇上俯念元旦日食非常之異。特發明詔求直言。通行中外各該衙門官員。痛加修省。共圖維新之治。夫直言者。盛世事也。故曰主聖則臣直。禹之告舜。則曰無若丹朱。傲慢遊是好。傲虐是作。罔晝夜頌頌。罔水行舟。朋淫于家。用殄厥世。姬旦之告成王。則曰無若殷王受之迷亂。酗于酒德哉。夫聖莫過於大舜。其不爲丹朱。曾謂禹猶不知耶。成王嗣周之初。其不宜指以亡國之主。曾謂姬旦有不知耶。而二臣直言如是。此見虞周君臣和氣。洽於上下。略無猜疑。所以更相飭戒。用成迂衡之治。所謂泰和元氣。在唐虞成周。宇宙間誠爲知言。後世忠臣。務爲諷諫。意非不美。第言辭微婉。未免蔽晦本意。莫若直言直指。尤爲光明。何事爲今日大難。而最當先務者。何事爲今日大費。而最當先罷者。何人爲大賢。而爲今日當先舉者。何人爲大蠹。而爲今日當先退者。何事爲今日最所忌諱。而難言者。何事爲今日最爲緊要。而難行者。何刑爲枉而當正者。何賞爲濫。而當節者。凡有關於時政。務要知無不言。言無不盡。明白直陳。毋晦正意。萬一所陳有可裨補聖德者。不妨已精。而益求其精。已盛。而益求其盛。將見行之天下。而臣民稱聖。傳之後世。而史冊生輝。各該衙門官員。將奉德意。將見賢者益自砥礪。而勇於爲善。中才益自振作。而求入於善。不賢者亦知所畏憚。而改行以從善矣。陛下和德於上。自宰相以至百執事。和政於下。百姓泰和於天下。天地呈祥。神人胥慶。實我明萬萬世無疆之福。皇上萬萬歲無疆之壽。宗社幸甚。天下幸甚。微臣一念忠赤。冒昧進言。伏蒙天鑒。雖萬死亦無辭也。謹題嘉靖二十一年十二月二十日題。

吏科給事中臣周怡謹題爲懇乞聖斷俯從人心亟罷不職大臣以重禦侮根本事

臣竊惟連歲敵人大肆寇逼更番迭入殘困山西震驚畿甸人皆知籌邊失策由撫總之臣不職以致鄰敵輕忽突來突去肆無忌憚不知邊臣不職實由根本之地大臣不職之所致不於根本之圖而惟枝葉是務未見其善也夫禦戎之要莫急於兵馬錢糧根本之地莫重於戶兵二部兵食不足雖有良巡撫名總兵亦無所用其智勇戶兵不得其人而欲足食足兵亦必不可得也臣觀戶部尙書李如圭之理錢糧是果有經國之謀者乎今當邊圉多事主客官兵所急需者惟在糧草一有不繼則難以號令而策勵之各鎮撫臣每有題請荷蒙皇上俞允下之戶部議處如圭昏然醉夢漫不經心該部司官各以職掌呈議方且悻目視之叱言邊鎮之事自有邊鎮之臣當處何預戶部動爲題覆夫尋常無事之時尙當悉心竭力變通調度以求生財裕國之道今乃於要急之日蔑視國事罔修職業闕茸無爲誤事不忠如此將焉用之今山西地方屢遭兵革上厪聖心軫念生靈去歲蠲免稅糧二年今又蠲免二年又發內帑之銀專命大臣賑濟其憂深慮切真痲痺乃身之心也如圭曾亦思所以仰承德意下恤邊方上不病國下不病民而有變通調度之方否耶臣又訪得河南周府往歲奏增祿米價銀比時戶部尙書李如圭貪受賄賂不思大計不行勘查徑自覆題每石加銀壹錢該加銀貳萬肆千餘兩原價每石折色叁錢伍分遵行已久尙且歲有積欠無能追納河南巡撫都御史魏某某因地方時勢之難又經題奏戶部宜圖上下經久之計大爲處置如圭竟不爲之一處臣見舊逋愈加積欠新增徒有虛數而已臣聞周府知撫臣有奏令

人齎銀壹萬餘兩。賂送李如圭等。乃爲覆題。仍准加銀壹錢。周府分派祿米。每石扣支銀伍分。該銀壹萬貳千餘兩。以補前費。遂致宗室閔然不平。訐呈巡撫等衙門。至今追銀問罪未結。夫王府係天潢一派。帝室懿親。其應得祿米。自有定數。應增應減。自有法例。其屈伸盈縮。與時消息。是亦該部之責也。如其當增。則亦當查前此何爲而不增。及今時可增與否。明白議處。請自上裁。豈可貪受賄賂。以私賣耶。如不當增。則枉法受賂。尤大不可。於王室至親。尙敢奸貪不法。而況於其他耶。夫以大臣而志在貪利。則於國事宜其昏然而莫之理也。河南見鞠其獄。明證指驗。人人得而知之。況河南連歲災傷。河南邊防之費。困不可支。今又歲增銀貳萬肆千餘兩。巡撫知其難而處之。戶部獨忍不爲之一處耶。況今日大功之建。邊防之費。日新月盛。朝廷之帑藏已虛。百姓之膏脂亦竭。雖各宗室賢王。亦知上體國憂。皆有孝敬之心。各獻金銀以助朝廷之萬一。寧得於祿米定價。更欲求加以重困朝廷耶。如圭職掌司農。罔思國計。徒負癯樵之軀。四維不知。無異土木之偶。一籌莫展。乃反徇私貪賂。賣朝廷之恩。壞國家之政。王府不霑實惠。百姓日見流亡。尙何望其生財足用。以給邊防之需耶。如圭不罷。欲求錢糧之有調度充足。決不可得也。其兵部尙書張瓚之司兵馬。是果有折衝之才者乎。屢經言官論劾。不知求退。每荷皇上姑留。罔知報効。凡一都督、總兵、副參、遊備之陞補。無非平時賄賂之私人。其賄賂者。豈皆盡取諸私囊。無非借貸於巨室。一得陞補。卽遂刻剝軍士以償債肥家。如此用人。安望其有奮不顧生。舍命敵愾者乎。瓚今雖痛念邊毒。重惟主憂。不受一賂。而用智勇之將。其爲用者。亦確信平日之心術。而深疑今日之舉用。以爲危急之日。雖擢用

不計而饋賂之乏。終任用不墜。後之繼今者。亦猶今之繼昔也。今日何賴於瓚而尙可任用之耶。以爲福將耶。則今日折衝非才明矣。以爲罷瓚則無能代者。自古無借才之憂。堂堂天下。豈以無人爲患耶。往者陝西奏徵倖之功。本兵先蒙殊賞。廢子錦衣。該司郎中王某某。卽陞應天府府丞。今日山西屢至失事。巡撫總兵實之重罪。則本兵亦當先受顯戮。其仍有當連及者。亦宜詳議可否。豈有成則先論其賞。敗獨不可分受其罰。卽近日山西被兵搶掠二十七州縣。孳畜一空。子女盡去。殺傷之慘。尤不忍聞。兵部近議用夜不收三十名。在京常川往來。瓜探消息。緩急以爲之備。巡撫山西都御史劉某。乃厚賞之。該部復厚勞之。令其勿言山西之慘。止言敵人已困。殺馬而食。職方司郎中楊某。公然揚言士夫慶敵之困。以懈衆心。以罔朝廷。瓚等職掌本兵。九法罔建。乃互爲欺蔽。上負聖眷而不顧。甘心貪昧。下犯人言而不恤。尙何望其折衝萬里耶。張瓚不能欲求智勇忠義之將。決不可得也。是二人者。不宜一日居乎其位者也。其提督十二團營兵部尙書劉天和。年垂衰暮。日薄桑榆。步履艱難。足欲前而屢卻。氣血衰憊。志欲銳而莫遂。昨觀各城門揚兵之議。有同兒戲。此可觀謀矣。團營之兵。挑選精銳。內以爲王室干城之重衛。外以備四方不虞之救援。必須精敏奮厲之臣。以提督之。則可以作六軍之生氣。以備萬里之長城。今天和果方叔元老而克壯其猷者乎。竊謂其自知必不能也。重兵要務之地。非養老圖安之所。若用此衰憊以當重任。必誤國家之大事。但天和壯歲自立。素負重望。今及衰年。精神策勵。自不能前。合口容令致仕。以全晚節。別簡才智勵精之臣。以充其位。則於國體軍務。兩得之矣。朝廷命廷臣集議。更置撫臣。博求將材。又命勳臣

傳諭戶兵。其所以籌邊經國。必期兵食之足。將帥之良。計出萬全。戰可百克。大宣威於沙漠。以解邊民倒懸之望。快中外雲霓之心。以致聖心焦勞。慮傷心血。主憂臣辱。分義不容已者。一時大小臣工。罔不思忘生狗國。奮勇敵愾。以紓皇上西顧之憂。而重要之地。尙使匪人充之。則無以新天下之耳目。鼓中外之勇志。是亦尋常虛應故事而已。未見其實。修內攘外。爲匡國安邊之圖也。伏望皇上軫念邊陲。重圖根本。施大威斷。慎簡重臣。或令自陳。或令致仕。早賜罷黜。速易賢才。以圖億萬年長久之計。以振今日中興之治。實宗社無疆之福。邊方再造之願也。臣待罪言職。深隱時艱。但知一得爲國之忠。不顧衆怒殺身之禍。惟聖明留神裁察。則宗社幸甚。天下幸甚。臣冒昧進言。無任殞越之至。嘉靖二十二年二月初二日題。

吏科給事中臣周怡謹題爲糾正撫臣濫舉失體事

竊惟治理之要。莫先於用人。勸懲之機。莫要於揚激。伏覩勅諭。巡按御史。必曰勸懲得體。人自敬服。欽此。朝廷之予奪。部院之考察。皆據撫按舉劾之疏。舉劾之典。誠鼓舞人才。轉移治亂。關係匪輕。不可不慎也。是故舉劾當。則剛正廉明者定。而貪暴卑諂者遠。舉劾濫。則剛正廉明者恥。而貪暴卑諂者肆矣。部院據監司之舉劾。考庶官之賢否。而監司之賢否。亦於此焉辨。史曰。達視其所舉。是已何也。水流濕。火就燥。各以類從也。近閱巡撫湖廣右副都御史陸杰。論官屬賢否。境內人才各疏。其所論薦。果協公論與否。臣不能悉知。但平居論人。咸謂才難。今觀本官所舉。未免雜濫太甚。卽今日之方面。既有舉而無劾。則來年之考察。宜有陟而無黜也。照磨縣丞。非謂無賢。竊謂天地似廣。未必若是多賢爾。其一疏薦大冶縣主簿郭

某某。則曰縣知有丞而不聞有令。其一疏薦大冶縣知縣張朝錫。則曰端謹自持而民隱恤。剛柔相濟而邑政修。夫既不開有令。張朝錫又何爲而薦耶。兩疏並舉。自爲矛盾。其薦境內二人。而廖道南與焉。夫道南。何如人也。人品鄙劣。心行汙穢。貪淫邪媚。里閭所賤惡。縉紳所不齒者。卽有華藻靡詞。不過雕蟲小技。非有本之學。理到之言。居可訓俗。出可華國者也。已燼之灰。夢想再然。旣腐之木。妄覩復發。在道南蓋晝夜未忘。寢食在念也。苦恨無階可進。漫自獻頌。希圖使其在位。猶當力詆屏斥。以清仕班。今旣考察不謹。奉有明旨。閑住。是舉朝公論。衆以爲不可而退者。非若偶遭譴謫。或一二人之論劾者。可同日語也。杰或不知而舉之。不明也。知而舉之。不忠也。不明不忠。將焉用之。杰之大槩。昭然于所舉見之矣。臣又見近日各處巡撫舉薦太濫。大抵資秩已崇。類皆援結自固。甚者因而爲利。又其下也。況嘉靖二十三年正月。該考察天下來朝官員賢否。雖曰黜幽陟明。而黜尤最重。若不嚴行申明。未免承訛襲舛。虛應故事。賢不肖無所勸懲。而治理荒矣。伏乞陛下軫念生靈。圖惟治理。降勅切責陸杰。引用匪人。大虧忠藎。薄示懲罰。仍勅吏部查照該部近題。准事理申諭各處撫按。悉心博訪。務要甄別賢否。無惑人言。無持兩可。無徇鄉故。無偏愛憎。無悅諂佞。而醜正直。無庇權要。而疏孤寒。除撫按接任未及三月者。不必舉劾外。其餘無分遠近。俱限二十二年十一月以裏。各具所屬賢否實跡奏聞。其例不舉劾者。明開揭帖。定註的確考語。另送部院查考。來年考察。衆以爲可黜者。查撫按之疏。卻在舉列。則撫按連坐。爲妄舉者戒。庶舉劾精嚴。勸懲得體。賢者日興。不賢者日遠。而治化彰矣。其境內人才。務要察其才德。果係天下之望。去位非有不滿之

罪。方許論薦。其鄉評素短。善狀不聞。不許徇私妄舉。以爲他日起用之地。其有違例舉者。罪深作俑。惡同圮族。聽部院考察。科道論劾。則公是定。而士風端。其於治化。豈曰小補之哉。臣待罪該科。義不容默。惟聖明宏納。庶官幸甚。天下幸甚。臣冒昧狂瀆。無任戰慄隕越之至。緣係糾正。撫臣濫舉失體事。理未敢擅便。謹題請旨。嘉靖二十二年四月初五日題。

吏科給事中臣周怡謹題爲姦愴輔臣欺罔專恣懇乞聖明早辨嚴絕以防微杜漸事。

嘉靖二十一年八月十五日。伏蒙陛下勅令禮部尙書嚴嵩入閣辦事。維時臣等卽論重位不宜任以匪人。旣而言論紛集。未蒙採納。而於嵩也。任之益篤。遇之益隆。夫豈真以嵩爲賢。而任之勿貳耶。抑豈以臣等之言。真爲未是。而不用耶。蓋以嵩之奔走於陛下左右。亦有年矣。其心術之奸回。行檢之污穢。人品之鄙劣。識見之淺陋。亦已照之悉矣。第以目前奔走承順。頗可驅役。一時未有當意者。姑令承乏。亦因以試之。庶幾感深圖報。因言知恥。飭躬勵行。改惡自新。嵩未必無人心者。嵩因人言。自陳之疏云。臣之負冤。真若沈於苦海。又云。入泥往事。爲嵩計者。宜蚤夜以思。上感聖明。簡任殊遇。於衆怒羣猜之日。下恥人言。顯詆微譏。以崇凶極醜之名。痛省往愆。翻圖新美。庶幾上可以仰答聖明之萬一。下可以少息人言之責望。不宜積迷不悟。就下不返。長負國恩。反讐公是。卒自同於盧杞。裴延齡。同流近於嘉靖二十二年二月內。又蒙陛下賜嵩以忠勤敏達銀記。殊錫異數。日新歲盛。嵩自揣分遭際奇逢。卽殺身以報。猶爲恆情。古云。士爲知己者死。況一身復荷聖明之陶鑄耶。陛下錫以忠勤敏達四字。豈謂嵩果能稱此耶。夫亦金錢愧

心之意。將使嵩思果忠矣。敏與達矣。抑未能如聖諭之責望耶。反觀內省。夙興夜寐。勉求四字。上以增聖明用人之光。下以稱輔臣弼君之任。聖意淵深。或在于此。嵩自翟鑾臥病未出之後。幸可以專柄攬權之時。凡近日陛下於在廷諸臣。小懲大戒。無非激勵羣策。共圖治理。中外警惕。罔不戒省。此卽日月之明。雷霆之威。人所共見。共聞者也。爲輔臣者。卽有稟擬諭旨之役。亦不過贊理化育。而從違可否。出自朝廷。孰敢竊以爲威福耶。書曰。惟辟作威。惟辟作福。臣無有作威作福。臣而有作威作福者。必害于而家。凶于而室。典刑具在。孰敢不欽。嵩乃揚揚自竊。爲威福。遂使待罪承恩者。車馬駢集于私門。少不順附者。卽有播弄。近如王堯封。其爲人不齒于士論鄉評。人人知之。嵩等不知何故。乃欲援引。卻妄稱陛下之意。欲用之。親約吏部尙書許讚到東閣。傳示聖意。比該部猶以未見的實。且未推舉。及奉明旨。再推兩員來看。欽此。然後以王堯封推上。果蒙欽點。一時大小諸臣。驚愕無措。以爲聖嚮方切。姑各忍而未言。果能不負。則亦已矣。如其誤事。言之未晚也。茲南京科道等官張汝棟等。各具疏論劾。卽奉明旨。王堯封著照前旨。不許推用。這員缺另推兩員來看。欽此。綸音煥赫。宸諭煌煌。中外諸臣。豁然痛快。至明至斷。乃聖乃神。堯舜其猶病諸。不意聖明之世。嵩等乃敢欺罔。一至於此耶。卽陛下有欲用王堯封之意。嵩等猶當力論其未可。堅執以爲不敢奉詔。不宜依阿曲從。致皇上有後悔也。矧非出聖意。則嵩等欺罔之罪。律例昭然。嵩又嘗對人言。卽今翟鑾病久不出。嘗以是面奏陛下。房杜謀斷相資。臣以一身兼之爲難。陛下稱以古昔周公亦只一人。此言有無不可知。誠如聖諭。則嵩當毛竦汗流。愧悚不暇。佩服聖訓。永言師法可也。尙可。

揚揚誇詡于人。以自侈大耶。周公之相成王。其事具在方策。嵩盍取以爲則。輔相之職。莫大於進賢。退不肖。勸善。懲惡。爲朝廷樹風教。貽典則也。今多事之時。正以求賢擇才爲急。海內英豪。不爲乏人。見任去任。寧無數人可用者。嵩可諉于不知耶。知則宜時聞于上。出格推用。爲時解紓。未聞其推一賢。舉一能。是蔽賢也。不知則宜汲汲求之。不宜泄泄杳杳。美食安坐。行呼唱于內庭外衢而已也。如樊繼祖附勢媚竈。蠅營狗趨。惡跡穢狀。真有罄南山之竹。不足以盡書者。姑舉其兩端言之。如築城。與前任霸州兵備副使王鳳靈。上下通同。燒磚冒破。得銀巨萬。不數月而冒破無存。喪師債軍。仍以爲利。此誠盛世之賊臣。不容于死。臣尙追恨夏言。相爲依附。未究罪狀。若使老死牖下。猶爲大刑之逸。近以傳奉起爲工部尙書兼都察院。都督採湖廣大木。督木雖今日至急之務。在廷在外。未爲無人。何必于罪人樊繼祖耶。嵩宜極力爲陛下陳之。何未聞其出一言耶。大臣歿後。贈官贈諡。朝廷勸善懲惡大典也。見尊賢賤不肖。雖身後不少假也。凡大臣歷任雖久。曾經論劾。不許濫請。已故兵部尙書張瓚。在任無一善狀。劾疏無啻數十。上負國恩。下遺邊患。明刑倖逸於生前。顯褫宜行于歿後。顧乃恩典備隆。贈諡兼極。近該禮部又題。已故致仕原任南京兵部侍郎呂柟云云。未究厥施。方切□□宜隆恩典。用慰賢魂。茲奉明旨。呂柟諡罷。夫褫張瓚之官。可以懲惡。增呂柟之秩。可以勸善。恩禮所加。風化所關。凡此皆嵩當極言力論於陛下。務使進退不致乖人望。勸懲有以維世教。嵩皆無一言及此。則將焉用彼相哉。陛下聖明天縱。剛斷雷轟。照羣慝於隱微。發大愆於漸往。昔任張孚敬。則用夏言以防之。任夏言。則用霍韜以防之。方其才猷略效也。則確然任之。而

不二。及其惡跡漸張，則斷然去之而無疑。此陛下之神機化權默運，超駕百王者也。傳曰：人臣無將，將則必誅。易曰：履霜，堅冰。至言辨，不可不早辨也。今遇聖明在上，嵩等豈敢有他哉！顧其惡德日崇，非心不悛。聖眷益隆，而怙終益甚。人言殊劇，而遂非殊熾。（以下闕十行，每行二十一字。）

吏科給事中臣周怡謹題，爲懇乞聖斷，俯從言官，亟出匪人，以崇治體事。

臣待罪吏科，近接到一本，爲大臣貪污素著，恐不能仰答聖心，以副倚任。乞賜黜罷，別簡賢才，以慎固留都事。該南京兵科等科給事中張汝棟等論劾南京參贊機務兵部尚書王堯封等，因奉聖旨，王堯封著照前旨，再不許推用。這員缺，便會推兩員來看。吏部知道，欽此。又接到一本，爲慎用人，以崇治體事。該吏部題覆，巡按貴州監察御史趙某某論劾輔臣翟鑾，引用王堯封、費案等，因奉聖旨是。各該論薦官員，你部裏嚴加掄簡，遇缺從公定擬聽候點用。若所薦所用不宜的，著兩京科道官即時舉劾。欽此。又接到一本，爲大臣庸鄙，不堪任使。懇乞聖斷，速賜罷黜，以重朝宇，以清仕途事。該吏部題覆，工科給事中李綸論劾工部尚書甘爲霖、樊繼祖，有干清議等，因奉聖旨，甘爲霖已有旨了。樊繼祖奉命督催大木，且留用。欽此。又接到一本，爲懇乞天恩，俯賜罷斥，以息人言事。該工部尚書甘爲霖奏，奉聖旨，恭舉廟建在卽，卿宜卽出供職，以副委任。不准所辭。吏部知道，欽此。臣於各疏反覆諷誦，慨嘆不能自己。此見陛下總攬乾綱，赫啓離照，因言官之論，或允而徑去之，或下之該部，因該部之執，或允而申命之，或示以微權，批答渾然。昭示懲戒，使留之知愧，任之爲辱。真天語元機，聖明衡鑑。在廷臣工，莫不惕然警省，肅然畏服。臣愚遭逢

良會竊懷一得。敢不敬陳。甘自負於聖明之世耶。伏思陛下於言官之言。貴能聽。尤貴能用。聽而不用。猶不聽也。於羣臣之佞。貴能知。尤貴能遠。知而不遠。猶不知也。王堯封幸。賴聖明已斷。然去之無疑。大快人心。其樊繼祖奸佞詭祕。情罪深重。比之堯封。不止於去而已也。臣請歷數其詭祕欺罔之大罪有五。往年奉命督築鞏華城。通同霸州兵備副使。今陞廣西參政王鳳靈。冒破輒價。各得銀巨萬。八郡之民。恨不食二臣之肉。此其詭祕欺罔之大罪一也。及邊烽緊急。廷推總制。抗沮不往。繼祖被論劾。卻又飾詞請往。以掩前罪。實非誠心直道。此其詭祕欺罔之大罪二也。荷蒙特宥。仍命領其事宜。誓以馬革裹屍。必期破敵自贖。願乃嬰城自避。不見一敵。不發一矢。石門兒縱殺降人二百餘人。詐稱首級。妄奏捷音。此其詭祕欺罔之大罪三也。又奏帶帑銀百萬。自宜敷宣德意。使兩鎮之兵。人沾實惠。乃指稱客兵支費。不三四月而冒破遂盡。及原任刑科給事中龍遂。劾其老師費財。繼祖奏辨。內以九十萬原數計之。尙未支使十分之一。何謂費財。又嘗奏曰。糴買糧草。升束未動。及新總督翟鵬交代之日。則已奏宣大倉場。在在空虛。培尅侵漁。無而爲有。此其詭祕欺罔之大罪四也。諂媚紀功科道。欲求彌縫其迹。事既不諧。又諂事近侍。爲之內主。卒得朦朧罷任聽勸。倖免其罪。併其勘復朦朧中止。人至今恨之未已。誠所謂百足之蟲。至死不仆。此其詭祕欺罔之大罪五也。又嘗觀兵部題覆大同巡撫龍大有查處軍儲馬匹銀兩緣由。奉明旨顯是樊繼祖前後所奏。情涉虛誣。不會著實幹事。是繼祖欺罔素著。聖明久已洞照。負陛下重託。壞國家大事者。斯人也。惡同胡守中。而詭祕欺罔過之。使繼祖之肉於畿甸。則八郡之民。可以忘勞而不怨。梟繼祖

之首於宣大。則兩鎮之兵。可以忘死而勇於戰矣。夫與大役。動大衆。傾大帑。不能爲國家出一毫末之力。而又因以爲利。是可忍也。孰不可忍。陛下必欲役民卻敵。則於繼祖之罪。不可以不究。而尙可以復大任耶。且近年邊方失事之臣。史某、陳某。旣罷斥於前。龍大有、劉臬、王陞、白爵、李蓁、張達等。又皆掣解來京。見今聽問。而罪魁繼祖聽勘未結。又復大任之。則法亦不足以服人。爲繼祖者。亦懼明神共殛。將魂奪魄。必不能安然以赴命也。國君進賢。如不得已。左右諸大夫皆曰賢。未可也。國人皆曰賢。然後察之。見賢焉。然後用之。今繼祖罪惡。國人諸大夫皆以爲不可不究。而陛下起用之。臣竊以爲若出左右之譽。請陛下顧左右譽之者爲何如人。若出陛下之特知。臣不敢不謂非堯舜之一誤也。陛下如以臣言謬妄。請試之。徧詢廷臣。更請廣布緝事人員。歷訪遠近。如有一言譽其功而辨其枉者。臣請卽日伏欺罔之罪。萬死不敢辭也。至若甘爲霖。庸鄙自居。無他行能。止以工作躡躋八座。宜思遭際非常。勉圖報效。夫何驕恣無忌。貪得無厭。每幸大工爲奇貨。據恩典爲巨肆。今朝廷內有不得已之大工。邊有不得已之大兵。公私匱竭。賣官鬻爵。已無不至。爲霖顧不知耶。如給事中李綸所奏。則爲霖尙爲有人心乎。欺君誤國。市恩分利。鄙夫如此。而久居重位。六卿羞與爲列。賢者疏而遠之。誠不可一日復玷清班也。伏讀綸音。恭舉廟建在卽。卿宜卽出供職。以副委任。蓋以大事在卽。姑令文思院頭目董之而已。彼昏不知省。幸不失富貴足矣。又安能感聖言而知愧耶。鄙夫愧辱。固無足惜。但大臣者。國之表也。大臣虧體辱朝廷。亦甚矣。伏乞聖明。秉心不貳。去邪勿疑。樊繼祖仍令回籍聽勘。嚴責原行勘官。作速秉公勘查。錢糧有無侵欺。首級有無詐冒。

奏請定奪。勘官若再稽誤掩匿。坐以黨惡。一併查究。甘爲霖聽令自陳致仕。速令吏部別推在廷公清忠敏大臣數員。疏請簡用。以代其任。則虞垂作工。寢成孔安。非徒集事。而大臣體貌亦自隆重矣。重大臣者。所以尊朝廷也。王鳳靈付之吏部。以備考察。淑慝旌別。懲勸分明。則賢者勵。不肖者遠。爲朝廷集大事。驅大慝。不患無人也。如繼祖輩不復究治屏斥。彼必曰。我欺罔敗露如彼。而上不之責矣。言事者疏我之罪。如此。而上不知聽矣。則必愈肆欺罔。公爲不善。而更無忌憚矣。姦邪得志。羣臣效尤。非國之福也。臣職在諫諍。志無回隱。但知爲朝廷舉大欺蔽。守大法。持大體。非爲私言。惟聖明試審思之。臣無任激切忠懇之至。嘉靖二十二年五月初七日題。

吏科給事中臣周怡謹題。爲懇乞慎簡秩卿。以表式官僚。以敬交神明事。

近見刑部問過犯人陳某某。違法姦盜。極備諸醜。大穢清規。皆由先任太常寺卿掌寺事禮部左侍郎金某某主張縱容。且爲媒求納賄脫罪。已奉欽依。陳某某發邊衛。永遠充軍。金某某不必提問也。著爲民欽此。臣愚竊惟太常之職。專一以敬事神祇。協和上下。卽虞典夷夔之任。周禮宗伯之屬。關係實匪輕也。若得一齋明貞靜之人任之。則所以表正官僚。慎重祀典。籩豆靜嘉。八音克諧。將見百神宵悅。萬福來同。陰陽調而雨暘時。民人樂而品物育。鳳儀獸舞。禎集瑞叢。泰階平而王道盡矣。天下太平。其機未必不在此。詩曰。維此文王。小心翼翼。昭事上帝。聿懷多福。又曰。肅肅在廟。又曰。於穆清廟。肅雝顯相。濟濟多士。秉文之德。對越在天。駿奔走在廟。此見文王事天祀祖。盡其誠敬。而顯相多士。皆秉文王之德。恭惟我皇上

敬天尊祖。精一無二。仁孝誠敬。于文有光。其承事駿奔。決不可以匪人參之。今太常之卿。卽顯相也。其承郎樂舞。卽多士也。伏思皇上夙夜在公。恭默思道。其欲慎簡此輩。蓋恆軫宸慮。未間也。乞勅吏部慎選其人。以帥其僚屬。或詞林耆宿。或卿佐名賢。無分在位在家。務求道德純潔。文學淵閎者。俾充其任。則精白誠虔。靜共厥位。上可以仰克皇上之顯相。幽可以協贊神明之孚格。其諸僚屬多士。表式有儀。齋明成風。天人之際。感通之妙。真不可以言語粗述者。芻蕘末見。千慮微忱。倘蒙聖明採納。神人幸甚。天下幸甚。臣愚不勝懇切惶悚之至。緣係慎簡秩卿。以表式官僚。以敬交神明事。理謹題請旨。聖旨該衙門知道。欽此。嘉靖二十二年五月十六日題。

吏科給事中臣周怡謹題。爲懇乞天語。嚴諭中外諸臣。以重新命。以責安攘實效事。

臣伏見皇上以連歲山西殘破。門庭之患。堂奧之憂。昕夕不寧。慮傷心血。其欲修內攘外。無時刻不在念也。頃因言官。或歸咎邊臣。撫總不得其人。或歸咎大臣。戶兵不得其人。荷蒙陛下納諫如轉圜。悉俞其言。亟令所司集議。必求其可代者。赫然英斷。中外一新。一時大小臣工。肅然警惕。罔不內省。曰。大聖人之作。爲真如風雷之迅。蟄無不啓。立無不偃者矣。又嘗閱輔臣嚴嵩感激聖論。而陳言邊務一疏。內有曰。方今內外諸臣。每遇敵至。則皆驚惶。以爲患在不測。敵退則遂泰然。以爲無事。不復關心。明年夏秋之交。戎馬將至。又復驚惶。日復一日。歲復一歲。更無驅攘之策。斯言深中時弊。一時大小臣工。惕然驚省。人罔不自喜曰。有宰相憂國如此。何患內治不修。外患不息也耶。又見秋冬以來。半年之間。內自宰相。以及九卿之

長外自巡撫總兵以及兵備之員。盡更其人。一時大小臣工。翻然改觀。又罔不自慶曰。用人如此。又何患事功不成。而太平之治不可見耶。夫以天朝之大。禦彼一隅之微。似不假餘力。而摧枯拉朽之無難也。然非君相聚精會神。注意於彼。則中外人心。窺竊其意向。輕重而爲敏怠之。孰肯奮發而勇作也。今也君憂於上。相憂於下。中外羣臣。上體君相之憂。下恤邊民之困。榮感新命。大奮忠勇。精神氣焰。必能不假聲色。自足折衝萬里之外。敵人有不胆落心寒而奔竄者乎。臣愚私憂過計。猶以爲易作而難久者。意氣也。難得而易失者。幾也。易去而難得者。時也。皇上軫慮。亦以邊報之日殷。相臣懷憂。亦感綸音之懇切。是皆意氣所發。臣竊計相臣今日之憂。不識視前日之言何如也。是則微臣之所憂也。外而各邊巡撫總兵。一時盡易而新之。內而戶兵二部尙書。俱易而新之。乘時搆會。各勵乃志。各淬乃力。司農則思所以區畫平時。何以使糧餉之日足。有事何以備賞賚之不乏。司馬則思所以區畫何以運籌帷幄。何以折衝萬里。巡撫則思所以區畫地方之責。何以塞之。意外之變。何以圖之。總兵則思所以區畫何以使我兵有勇而知方。何以使外國畏威而遠遁。精神鼓舞。政令嚴明。罔不在厥初。此則幾之所不可失者。微臣之所憂也。往時料敵者。則曰秋高馬肥。敵志乃南。今一二年來。入夏卽張皇矣。以今計來歲之事。只在春三月之間。爾日月易邁。如駒過隙。年復一年。坐馳歲月。每至臨事。徒切噬臍之悔。亦何益哉。苟有上體君心。下恤邊禍者。必臥薪嘗膽。愛日以圖。中夜不寢。以謀安攘矣。寧肯泄泄優游。乃效燕雀處堂。尙幸突決棟焚之未及也。此則時之所不可失者。微臣之所憂也。傳曰。君命召。在官不俟車。在外不俟履。今戶部尙書王杲尙未見。

其赴任。是何濡滯也。兵部尙書毛伯溫。素隆時望。極荷帝簡。邇者蒞任。革弊一疏。未愜衆心。將官賄賂之行。全視本兵部好尙何如。昔楊綰以清名儉德。拜相之日。郭子儀方宴客。卽減坐中聲樂。京兆黎幹卽減騶從。中丞崔寬亟毀撤第舍。誠使門庭貞肅。則賄賂滅影。不令而自畏也。假令素志饕餮。則錢神蠅集。雖禁亦不從也。故曰。其所令反其所好。而民不從。弊非當革也。此亦新政常行文移。卽張瓚昔年未必無此舉也。所望於伯溫。非常謀猷。當不在此。而李篆、張達之議復。尤駭衆見。使伯溫選將。而惟二罪之惜。則年來控禦氣勢。亦已兆見於今日矣。李篆、張達。而非罪也。則此時宜內論。不宜輕拏。前輕易而拏解。今輕易而放縱。非惟觀者竊笑。臣謂李篆、張達。亦必心笑之矣。況二罪之才。非可孟明、韓信之比。又何必戀戀於彼。以重傷國體也。荷蒙聖明英斷。仍以二罪付之法司。員缺另行推補。中外人心。始帖然畏服。軍法嚴重。非同兒戲矣。伯溫時望所歸。而臣言如是。所以責備賢者。不自知其言之過也。各邊撫總之臣。今易已數月矣。未見建明大議。振舉大策。臣竊恐諸臣新易。不大懲創。振作是大爲新命之辱。微臣之所憂也。伏望皇上痛懲往事。大舉新圖。赫然斯怒。嚴諭諸臣。務令各勤乃職。各竭乃才。內則居中制外。外則捍外衛內。中外同心。將相協力。上以仰副皇上之新命。下以俯答天下之風望。近以安邊圻之軍民。遠以威沙漠之部落。無襲覆轍。無聘虛談。無失良幾。無玩良時。果能建功著効。朝廷當不吝爵賞。如其玩時致寇。許臣等科道官指名參究。必寘重刑。曾謂以天下全力精簡時才。竟爲區區部落所奔走。臣竊恥之。仍乞嚴促王臬上緊到任。糧餉一節。尤爲緊要。屯田鹽法。所當悉究。冗員冗兵。所當裁革。近見有欲議加賦者。此萬

萬不可。卽今四方水旱無處無之。戶部差官催徵累年積逋。則可見常賦有不解納者矣。而尙可加耶。與其加賦。莫若節用。與其加賦於民。莫若減俸於官。不泥常格。必有權宜。漆室之女。尙知憂葵。微臣待罪言官。私憂過計。惟恐有不及者。而敢謂其言之過耶。惟聖明留神。則一怒而作中外之志。一怒而安天下之民。宗社幸甚。天下幸甚。臣冒進狂言。不勝激切恐懼之至。嘉靖二十二年五月十五日題。

吏科給事中臣周怡謹題爲慎選久任。遵明旨。惜賢才。以裨治理事。

我國家因時立制。則周建官。六曹分職。序賢程能。非以遂私。維以贊化。吏部爲六曹之長。百辟之刑也。職掌最重。銓考尤要。蓋以進賢退不肖。其責大也。得其人則俊。又登庸。儉邪遠屏。治化之不暢也。鮮矣。匪其人則奔競盛行。諛諂得志。治化之不蠹也。亦鮮矣。此文選考功爲最重。而當慎選之。選得其人。又當珍其材。而久任之。任之久。自當殊其秩。而超擢之以昭勸也。臣伏覩綸音。今後文選司郎中著久任云云。欽此文選久任。則諸司在其中矣。此可見皇上序賢惜才之遐意也。近觀吏部卿亞並賢。屬僚咸勵。翼翼將事。明明布列。上下帥承。師師協濟。誠可謂慎選矣。臣獨懼久任之未講爾。竊見自奉明旨以來。文選郎中林春。以病卒於官。繼春者。考功司郎中高燿也。僅及五選。未周一年。已陞太僕寺少卿。繼燿者。稽勳司郎中王與齡也。燿之賢不及與齡。陞之驟。任之未久。人固不甚惜也。今與齡調任以來。精白一心。尙賢掄才。見任者序其勞資。閒廢者拔其德望。無倖進。無淹任。又照得考功司郎中鄭曉。持心公平。覈實精當。題覆敏速。蚤緣杜絕。明足以行其公。果足以成其敏。近雖意見不同。要非私蔽爲害。是二臣者。中外孚協。物議攸

同。不易其志。均可謂賢也。已。臣獨懼其照常序遷。則於二臣任不盡其才。事不終其志。而後來繼任者。雖才志不異。而諳練終殊。況嘉靖二十三年。適當朝覲考察之期。考功郎中尤爲緊要。於此遽易其人。深爲未便。今後吏部主事有缺。須九卿之長。會舉其司屬之賢者充之。務要行履端莊。問學粹美。器度宏達。無徒取其科第之崇。門徑之捷。但有囑託。卽非賢士。他日考察。卽以坐之。是亦備慎選之一節也。臣愚伏乞勅該部遵奉明旨。文選郎中務要久任。不許一年輒用推陞。仍乞限以三年爲準。今後再有違旨不及期而陞者。許科道官參糾。考功郎中每當內外考察。近期一年之內。不許推遷。以遂推避。庶賢才彙征。不肖者不得以倖進。貪昧速黜。鑽求者不得已遂私。官稱政良。化行俗美。太平治理。可計日而待也。臣待罪該科。義不宜默于聖明之朝。無任真切願望之至。緣係爲慎選久任。遵明旨。惜賢才。以裨治理事。未敢擅便。謹題請旨。嘉靖二十二年五月十六日題。

吏科給事中臣周怡謹題。爲內外大臣不和。乞賜天語嚴責。以敦國體。共濟時艱事。

臣惟人臣事君。無分崇卑。無分內外。皆以盡心體國爲忠。協力濟事爲和。舍己從人爲虛。忘讎序賢爲公。自古及今。未有不由此而臻治理者也。況卿輔大臣。爭於朝。撫總大臣。爭於邊。而能修內治。禦外侮。萬萬無是理也。近知內閣大學士翟鑾。嚴嵩。與吏部尙書許瓚。不和。互相詆評。及查兵部。先因大同總兵周尙文。奏討錢糧馬匹題覆疏內。知巡撫總兵不相協和。近據督理糧餉右侍郎趙廷瑞之疏。又知總兵張鳳。周尙文。與總制侍郎翟鵬。及督餉侍郎趙廷瑞。俱各不和。人持己見。各自爲心。此大不祥之事。誤國大禍。

目前立見。臣請先論其理而後及其事。易曰：天地感而萬物化生。聖人感人心而天下和平。傳曰：陰陽和而雨澤降。其論兵則曰：天時不如地利，地利不如人和。和之時義大矣。天地陰陽不能違也。近驗之一身。尤見親切。今夫心志寧靜，則目之所視，耳亦聽焉。足之所至，手亦從焉。各從心所欲而效其職能。然或目視而耳不聽，則見聞不相及。手持而足不行，則物位阻而事廢。其於心志所欲，曷克由濟。人君猶心志也。內外羣臣猶耳目手足也。人臣苟知尊奉心志，寧肯耳目自相違，手足自相賊耶。故曰：同寅協恭和衷哉。風教之大，禮讓爲先。禮讓之行，朝廷大臣爲首。朝廷者萬方之所宗仰，大臣者羣臣之所楷模。觀而效焉，必有甚者。朝廷有違言之隙，則讒譖之釁長於外。大臣有動色之爭，則攻鬪之禍流於下。由今遡昔，未之或易也。皇上臨御以來二十三年于茲矣。由初年求治之銳，以及今日憂民之切，宜乎天地地位而萬物育。太平有象而四夷來王也。今陛下日事禱祀而四方之水旱災傷未能消也。歲開納銀之例而府庫未能充也。歲頒蠲租之令而百姓未能蘇也。時下選將練士之命而邊境未能寧也。此其故何也。良由陛下勞心焦慮於上，而下未有肯將命之臣也。今何時也。以內則百役繁興，以外則九邊虛耗。爲輔臣者宜如丙魏同心，輔政房杜謀斷相資。夙夜匪懈，畏天命而悲人窮。凡可以利國家，惠小民，安邊徼者，無不精思詳畫。上以啓君心，下以勵羣工可也。夫何大學士翟鑾嚴嵩，憑藉寵靈，崇己徇私，播弄威福，市恩修怨。聞二輔臣在內，閣有違言失色。入見陛下，各有私陳背詆。是二臣已不和矣。何望其同寅協恭和衷以事上而風下也。輔臣以至九卿百執事，位有崇卑，均之爲耳目手足，聽命心志，以共成一身者也。宜相濟而不可

以相賊也。輔臣真知人之賢不肖。宜明告吏部。進之退之。則人心攸服。不宜挾勢徇私。以不可服人者。屬之進退。吏部宜有真心直節。如貞女烈士。使人望之知畏。雖權貴不敢以非義相干。不宜依阿奉承。一啓順端而後不可逆也。今嚴嵩威靈氣焰。凌逼百司。招權攬威。使凡有陳乞疑畏。罔不奔走其門。先得其意而後敢聞於陛下。中外之臣。不畏陛下而惟知畏嵩也。翟鑾則依阿委靡。不能張主。而氣勢之弱。猶不足以驅人之趨附。名位之先。亦足以爲嵩之妨礙。尙書許讚。兩世三居吏部。亦可謂世臣矣。雖曰小心謹畏。而直氣正色。不能預銷權位要求之心。弱亦甚矣。凡此皆陛下之洞照。知臣言之非誣也。詩曰。有來雍雍。至止肅肅。相維辟公。天子穆穆。此盛世之氣象也。今卿輔大臣。陰擠陽排。互相詆訐。以陛下爲何如主。當此之時。不思培植元氣。愛護人材。共圖折衝禦侮之計。而務修私怨。果何心哉。臣恐大臣不和。則儉邪細人。乘間抵隙。互相黨比。媒孽啓釁。非國之福。可懼之甚也。往時論劾輔臣。御史如謝瑜、童漢臣、相繼假公事而罪謫之去矣。其伊敏生、喻時等。亦已露於聲色。直言敢諫之臣。於權貴雖不利。於朝廷則大有力也。今皆假以公事。奉有明命。罪之謫之。臣恐自是無言者矣。陛下之臣。雖有如構杌驩兜。誰復言之。非國之福。可懼之甚也。今入秋宣大已報聲息。而文武總制大臣。各立門戶。各持意見。平時旣藩籬扞格。不祥和協。則必無長馭遠駕之策。臨敵掣兵。按伏對壘。將見甲可乙否。彼此非正。臣所謂目視而耳不聽。手持而足不行。其不誤事敗謀。臣不敢信也。朝廷設總制總督大臣。欲其權力足以制三軍之命。如頤指氣使。可無不如意也。今乃以相抗。各自爲大而恥相下。各自爲是而恥相用。是假之權位以相角。而非爲衛國。

禦寇謀也。大敵在前而文武構釁。非國之福。可懼之甚也。臣又見總督兩廣兵部尙書兼右都御史蔡某。舉劾方面守令官員。內舉布按兩司而劾一都指揮僉事。又以去任踰年踰月二知府。劾以塞責。舉文劾武。苟且欺罔。殊負朝廷簡命。重臣撫綏遐方之心。殊失鼓舞文武經略地方之術。今當致力中原。宣威沙漠之日。於忠勇將官。宜折節優禮下之。結其死心。庶可得死力也。使韓淮陰無蕭相國國士之知。終於遁去。岳武穆不有內制其禽烏珠。強宋室當無難也。今誠有韓岳之將。寧肯低眉俛首受制於文墨刀筆之吏耶。務須推赤心。置人腹中。明大義。激其烈志。有所異同。明白曉諭。不宜輒爲裁抑。以挫辱之。爲將臣者。亦宜乘時立功。奮勇先登。以作三軍之倡。不宜妄自尊大。自取侮辱。由是而人和所結。堅利於金湯。又何患敵國不成禽也。臣又聞近日邊事。內外掣肘。文武諸臣。誠喜於被論而退信如是。則上負朝廷推轂之心。下解三軍死綏之志。庸懦不忠。召綏人輕視之侮。爲國大辱。誤事非小也。臣愚無知。伏乞陛下。明垂離照。赫施乾斷。無惑近論。無忽遠圖。戒輔臣毋務修怨。以竊威福。戒吏部毋務依阿。以輕黜陟。戒撫臣無辱將官。以離士心。戒將官無懷小忿。以誤大事。此皆目前緊要。不可一日緩者也。更望陛下。優容言官。博采羣策。虛心聽納。先務和德於上。則大臣自爾公忠爲國。虛己忘讎。各務和讓於下。羣臣肅雍。百姓泰和。人和薰蒸。神之聽之。終和且平。區區外侮。有不足攘者矣。此皆係於陛下建中和之極。以先之。臣微小無知。竊見時事大傷國體。私切憤鬱。恨力不能排闥。以號訴于辰前。誠得天聽而見之施行。則亦可以報陛下。祿養洪恩萬分之一。卽日賜死。所甘心也。他日曖昧制於輔臣之手。如謝瑜童漢臣輩。陛下能知之乎。臣

愚無任戰慄隕越之至。惟聖明覆照宗社幸甚。天下幸甚。緣係內外大臣不和。乞賜天語嚴責。以敦國體。共濟時艱事。理未敢擅便。謹題請旨。嘉靖二十二年六月二十七日題。

吏科給事中臣周怡謹奏爲懇乞天恩認罪回話事。

先該臣題爲內外大臣不和。乞賜天語嚴責。以敦國體。共濟時艱事等因。於嘉靖二十二年六月二十九日申時。欽奉聖旨。周怡這廝所說諸臣不和。負君致禍。都是然本心初發。只是訕謗。曰朕日事禱祀。不知先務和德於上。人和薰蒸。神之聽之。夫朕事天禮神。多荷洪庇。至于四方之廣。豈得都無水旱。若論天下治安。則你每凡爲有位者。果能秉公竭忠。修和盡誠。同心贊主。何患不治安焉。他每內外諸臣不和。你每知道。如何不卽時指名劾奏。至此日纔說。著從實輸情。回將話來。欽此。臣聞命自天。驚悚戰慄。不知所措。委的昏迷狂妄。悖亂荷蒙聖恩。洪大。不卽加以斧鉞。且令臣從實輸情回話。臣恭捧綸音。委曲詳盡。伏地叩首號泣。仰嘆曰。大哉真聖人之言也。其容臣真天地之大也。其知臣真日月之明也。臣復何辭。緣臣愚昧。竊觀聖明孜孜求治。敬天憂民。昭格上下。諸臣不能仰體。各修私怨。誠恐上負君父。下誤時事。心切慮之。欲効犬馬之忠。陳于陛下。而臣之知識短淺。辭不達意。遂至狂妄悖亂。上瀆天聽。臣之罪也。又不能早見預論。臣之罪也。伏乞聖慈宏擴覆載之仁。大寬鉞斧之誅。矜臣之志。赦臣之愚。臣恐懼昏迷。不知所云。不勝悚仄隕越之至。爲此具本親齋。謹具奏聞。伏候勅旨。嘉靖二十二年六月二十七日題。

奉聖旨。這廝本心欲訕君上。且怒吏部不與太常用人同說。假以彈劾爲名。實是結黨害善。況這廝每所

惡內直諸臣以爲贊事大道。好生悖肆無道。著錦衣衛拿來午門前。好生打四十大棍。照楊爵例送鎮撫司牢固柙著監候。

太常寺少卿臣周怡謹奏爲感激天恩深厚。竭瀝血忱。以圖報萬一事。

竊惟受非常之恩者。當有非常之報。遭希世之遇者。當陳希世之義。臣狂愚小臣。不識大義。原任吏科給事。屢荷先帝知遇。感激圖報。於嘉靖二十二年。因論輔臣嚴嵩等擅權。內有先帝日事禱祀。未能殄四方水旱之災。致怒廷杖。下錦衣衛獄。桎繫五年。再逮再釋。當時人皆謂臣必不免於死矣。倖而免死。臣母在家。病危屬纊。望臣一面而不可得。人皆謂臣母子必不可得相見。幸而相見。復逾十三日乃終。此皆蒙先帝非常之恩。臣母子感激。何可云喻。臣舉家感激。何可云喻。臣常思粉骨糜軀。何以報萬一。惟朝夕仰祝聖壽萬年。皇圖鞏固。庶少盡愚誠而已。恭遇皇上膺天景運。嗣登大寶。念先帝遺詔。推廣德心。瀚滌臣罪。召復臣職。歷陞太常寺少卿。臣以五年之繫。萬死之餘。兩次釋放。生還送母終年。臣之際遇。至矣極矣。又得耕田而食。汲井而飲。二十餘年。臣之殘喘餘生。皆先帝之所賜。皇上之所庇也。臣之願望。極矣足矣。何敢復望收錄。召用。此誠非常之恩。希世之遇。古今以來所希覩也。臣當何以仰答萬一。夙夜深思。惟願皇上萬有千歲。永保四海之富。長居九五之尊。子孫千億。萬邦協和。庶幾臣之野心。少抒萬一。雖然。富貴壽考。子孫治安之久。長者非徒然可得也。必有德以享之。德非徒然可有也。必有道以修之。學也者。修德以享福祿之道也。學非徒然可能也。必有師以啓導之。必有友以輔助之。師友也者。講學以修德之資也。自

古聖帝明王。未有不由斯道以致治安者。誠思法古帝王。敬身修德。親賢勤學。以敬天勤民。則天心可格。人和可協。太平可致。而福祿可保也。大臣職專輔弼。師友之官也。若不與大臣相接。面商可否。徒以揭帖進呈。則精神終不流通。事理終有阻礙。何以作孚萬邦而感格天心。自古及今。未有是理。古稱君臣相得。如魚之得水。魚不可一刻無水。爲人君者。可數月半年不與大臣一面語乎。臣實狂愚。謹據千慮一得之見。列爲五條。開具上聞。伏惟俯賜一覽。存神深思。無徒曰該衙門知道。此非該衙門所當知者。緣係感激。天恩深厚。竭瀝血忱。以圖報萬一事。理未敢擅便。謹具奏聞。一曰定君志以修德業。君道之大。在乎知責任之難。在君與相。古聖帝明王曰。后克艱厥后。臣克艱厥臣。又曰。爲君難。爲臣不易。皆謂責任之難勝也。爲人君者。豈天固縱之居萬夫之上。得以自恣其欲。自肆其情哉。天地神人是主。宗廟社稷是承。其任甚大。其責甚重。此所以難也。知其難。則思所以圖之。不可忽易。古之知難者曰。予臨兆民。凜乎若朽索之馭六馬。兢兢業業。不敢荒寧。日惟稽古正學。明善惡之幾。辨忠邪之分。曉然趨道之正。在乎君志先定。志欲爲聖帝。則必法堯舜。志欲爲明王。則必法禹湯。文武爲之臣者。孰敢不敬。故曰。君志定而天下之治成矣。此之謂可久之德。此之謂可大之業。此之謂能稱君道矣。伏惟存神。二曰畏天命以消災異。人君爲天下臣民之主。所以奉若天道也。皇矣上帝。臨下有赫。君道盡則天命眷之。君道不盡則天命去之。天命眷則天下臣民是依。天命去則天下臣民是畔。此天之所畏也。古聖帝明王曰。我其夙夜。畏天之威。于時保之。然人君者。天之所立也。天心常仁愛之。君道盡則三光明。四時順。風雨時。百穀成。萬民安。君道不盡則天

亦念之。出災異以譴告之。垂戒之。欲其警惕而修省之。如堯之大水。則曰洚水警予。洚水者洪水也。湯之大旱。則以六事自責。今歲水災亦已非常。在內則官民之廬舍倒塌。在外則禾黍滄沒。舟楫漂溺。糧船損壞。人民溺死。非小異也。近報邊牆倒卸太多。一時修築實難。秋高馬肥。大可慮也。不大警省改德。徒曰修省。天意不可回也。必幡然改念。平日之所欲者不欲。平日之所爲者不爲。勤政親賢。去邪寡慾。一言一動。必就于正道。則一念之誠。上格于天。災異自消。百祥來降矣。伏惟存神。三曰敬大臣。以尊師道。古之聖帝明王。未有不由學而成者。唐虞君臣更相戒飭。君臣自相師友也。湯學于伊尹。武丁學于甘盤。太甲成王學于伊尹。周公皆學焉。而後臣之。宋程頤爲崇政殿說書。必坐殿上而講。後世不知此義。但以崇高自大。以威嚴臨下。不復知有尊師之禮。師傅保之職。三公之位也。三公坐而論道。我祖宗朝優待三公之禮甚隆。其於輔弼之臣。必稱先生。不敢以官名。不敢以名稱。一則曰先生。二則曰先生。每歷朝實錄可考也。仁宗以來。未之有改也。先帝世宗皇帝初年。於輔臣楊廷和等。猶稱先生。自後一輩諂佞之臣進。而始卑之矣。夫敬大臣者。以大臣近己也。所以自敬也。尊師傅者。以師傅成己之德業也。所以自尊也。不敬不尊。則視之如羣臣等。無有畏心。何所警惕。徒以官秩崇之。祿賜厚之。是不足爲敬爲尊也。要在敬之以禮。尊之以心。迎之則喜。送之若失。遇之則親親。溫言霽色。商訂可否。不徒以揭帖進呈。如是則情意孚洽。義禮開明。君道盡大而業成矣。伏惟存神。四曰擇左右。以慎近習。人之所居。莫大乎慎所與。與治同道罔不興。與亂同事罔不亡。故曰。與君子居。如入芝蘭之室。久而不聞其香。與之俱化矣。與小人居。如入鮑魚之肆。久

而不聞其臭。亦與之俱化矣。諺云：近朱者赤，近墨者黑。此理易知也。況人主左右，諸欲易遂，服用華侈，聲色艷麗，使令便辟，善柔便佞，充滿前後。其所言者，無非蕩心之言；所舉動者，無非肆意之事。一日與居，志念遂移，夙夜與處，染習無辨。古人戒之曰：不邇聲色。又曰：遠者德，比頑童，恆舞于宮，酣歌于室，狗于貨色，耽于音樂，流于遊戲，有一于此，未或不亡。故曰：人君一日之內，接賢士大夫之時多，親宦官宮妾之時少，則所以警省身心，發紓志意，德崇業廣，心泰神怡，樂莫大焉。內臣中謹慎小心，知義理，識大體者，亦多矣。善柔便佞者不少，選擇而使之，尤爲緊要。卽今秋涼，宜親近儒臣，日講不宜暫罷，伏惟存神。五曰勤朝政，以勅臣工。古人有言：一日之計在於寅，一生之計在於勤。故曰：雞鳴而起，雞鳴則寅時也。業精于勤，勤則有功也。自古聖帝明王，必憂勤惕厲，一日二日萬幾，不勤則荒惰宴安，萬事墮矣。傳曰：大禹聖人，乃惜寸陰，至於衆人，當惜分陰。經曰：克勤于邦。又曰：君子所其無逸。我祖宗建無逸殿，正訓以勤也。常朝必于味爽之時，味爽者，晦明未辨之時也。朝早則精神清爽，志氣清明，朝罷而退，百官各有警惕，得以修政立事。非曰小補，若於辰巳時朝，則百官亦有年大者，守候久而精神倦，未免廢事。習久則百官因循懈惰，怠慢自逸，無怪乎政治之不及也。伏惟存神。

南京國子監司業今陞太常寺少卿臣周怡謹奏。爲中途患病不能赴任，懇乞天恩，容令回籍調理，以延殘喘事。

臣年六十四歲，直隸寧國府太平縣人，少生羸弱，長益不知自愛重，久病虛羸，如羸卒，好挽強弓，竭力而

斷筋吐血。不勝任而死矣。自取之也。臣之遇事。前無所難。自反而心以爲能。雖千萬人。吾往矣。如衆方百萬前臨。卽孤軍深入以敵。不怯。但顧其理。不畏其衆也。如事勢甚難。爲人□袖手。臣直當之。不恥不鄙。臣一念効用之心。可識也。然往往輒僨事敗。謀多無成功。徒爲世笑。詈而作永戒。竟以此得罪。幸蒙先帝鴻慈大恩。寘之不死。五年之內。再釋其生。俾臣得侍彌留之母。旬餘而決。此恩此德。何厚也。此情此義。何日可忘也。皇上新登大寶。推念先朝罪臣。臣賤名亦在取中。召復原任。隨陞秩方南太常。卽改北寺。臣於其時。亦奮不自量。名爲報効。不知實已陷於大罪。隨奉德意。往海濱莅事一年。心神爽快。但山箐海怪。臣羸弱之軀。終不勝任。當時貪任其事。不顧有後之難。今來南都。事雖無勞。而積勞始發。遂大不勝任。去年戊辰十一月初四日。得疾起。送表謁陵節下。又習儀拜祝萬壽節。其日又上陵。病軀感以饑寒。遂日加重。今或起或倒。帶病應酬。至前六月初四日。一臥不復能起。荷蒙洪恩。補臣提督四夷館太常寺少卿。聞命躍心。拜官無力。志存報國。氣不能前。於本年七月內。扶病行至揚州府地方。瘦削見骨。臣自度此病未有痊愈之期。伏乞勅下吏部。容臣回籍調理。臣幸不死。尙願耕鑿擊壤爲太平頌。臣卽死。亦奮志地下。永爲國家鎮地之鬼。臣無任激切祈懇之至。爲此具本。令義男周久安齎捧。謹具奉聞。伏候勅旨。



論 對 錄

張孚敬 撰

本館據紀錄彙編
本影印初編各叢
書僅有此本

紀錄彙編卷之十

諭對錄

張孚敬

諭內閣張元輔

今日午時

皇伯母令內官傳示云 皇伯母親至朕處爲喜當
時朕卽知 皇伯母意止以張延齡爲逆耳朕差
內侍官往奏云適奉 皇伯母傳示親至姪處爲
喜但恐上勞 慈降又姪今日以秋開講奠先師
請 賜免降乃止又移刻復傳云明日仍行朕復

差人往奏云茲再奉 慈愛宜當承順人家生子

此常事也豈敢上煩 慈躬親降如有 教示請

傳來乃復止少頃復令內官持物到朕宮云

皇伯母說皇帝大喜事但張延齡事須將就朕聞

命訖朕惟上古之時無此等事厥後漢唐宋以來篡

位殺君者亦非一賊矣茲延齡也既爲朕

皇伯考懿親祇宜守分猶有餘乃包藏禍心謀爲不

軌是何道也執法大臣貪贓背義且前日本至閣

卿等亦未如法票上茲事甚大併所奉

皇伯母傳諭錄示卿等作速議處來聞

嘉靖十二年九月十一日

臣張孚敬謹題伏蒙

皇上因張延齡事情以昭聖皇太后傳諭併示臣等速議處來仰見聖明仁之至義之盡也臣等伏思均蒙皇上重託受恩深重雖事之至小者亦當預聞盡心區處况此事所關至大至重敢不盡心前者擬票委未能悉萬罪萬罪臣等愚見欲候法司具招上請乞示臣等詳其情節如何然後容臣等各自陳所見恭候聖明裁斷務極天理之公人心之正庶幾上副

聖明委託之重今恐一時倉卒議處未當未敢輕率
上聞伏乞聖明亮察謹具題 知

嘉靖十二年九月十一日

臣張孚敬謹 奏本月十一日伏蒙

聖諭以 昭聖皇太后傳諭張延齡事情錄示臣等
令作速議處來聞臣等捧誦無任悚懼戰慄之
至緣法官問擬尚未具招倉卒未敢輕議今日
伏蒙 皇上以三法司會問招擬 示臣臣叅
詳情節則張延齡殺人之罪自不可逃而謀逆
罪狀法官未敢遽擬夫亂臣賊子人人得而討

之况法官乎臣不敢輕議也茲欽奉

明命令臣等議處臣敢不竭誠以對伏乞

聖明亮察臣竊思延齡兄弟當

孝宗皇帝朝倚託 皇親勢要威制軍民謀佔田宅

通舟車則害及地方開店舍則利奪商賈此人
所共知也至

武宗皇帝朝 恩寵雖殺富貴血盈驕恣怙終不悛
奢侈僭擬無度亦人所共知也恭惟

皇上釐正 大禮以來于茲九年孝養

昭聖皇太后未嘗一日少間 朝野臣工靡不歡悅

在延齡兄弟亦所自知者矣茲大道公行過惡
敗露臣伏思延齡其他罪戾猶可追也罪至殺
人不可宥也昔孟軻氏論瞽叟殺人舜竊負而
逃漢文帝殺薄昭舅后家也

皇上承 祖宗之統守 祖宗之法况延齡以外戚
殺人卽曰誅之又孰爲不當乎臣又伏思延齡
過惡俱犯在 先朝良由法度寬縱所致誠當
嚴禁防於 今日者也但古人有言曰恩有所
當加法有所當屈此仁義並用之道也

聖諭云延齡 皇伯考懿親至哉 皇言仁哉

皇心也 孝宗皇帝 獻皇帝親兄弟也

皇上萬一推 獻皇帝友愛之心以全

孝宗皇帝懿親叅之應議律條待延齡以不死亦惟
在 聖心轉移間而已然於此宜必有處之之
道焉削其封爵覈其占據田宅悉入之官遠而
編戍可也爲民可也其兄鶴齡容令辭爵較與
武職亦遠爲全避之計至於

仁壽宮左右內侍務更要選謹慎老成以供
昭聖皇太后使令庶免間惑

皇上孝養之誠日益加至如此則 兩宮懽欣交通

九廟之靈無不 鑒臨者也此臣區區一得之愚不
敢自昧惟

聖明采擇焉臣無任惶悚戰慄之至謹具奏

聞

嘉靖十二年九月十四日

諭張元輔

適卿三人各以免問張延齡爲對夫朕以卿等爲
左右大臣必爲我

皇祖保天下以殺逆賊今却說延齡爲

皇伯考懿親夫懿親不過懿親同姓尚處死况懿親

乎又曰事遠人亡又曰恐傷

皇伯母心此言尤非大臣之言其曰事遠人亡卽聶賢說事未行者同曰恐傷

皇伯母心者夫婦人以夫家而爲家更有何依

皇伯母上配 孝廟正宜思感以發其好可也曰傷心是導之以啓私庇而必欲害國也夫今之天下皇祖之天下天下之天下非今日之君臣所能創立朕雖弱昧昔奉 皇天命承

皇祖統緒不得不爲之係神器正紀法今如欲不問亦自卿等行之來世必有通賊之毀不必待朕責

也

嘉靖十二年九月十四日

臣張孚敬等謹題前日臣等伏蒙

聖諭議處張延齡罪狀臣等遵奉

欽命各以一得愚昧之見上聞亦惟自盡此心之誠而已茲蒙

天語切責臣等不勝惶悚之至謹擬票上請伏乞聖裁

嘉靖十二年九月十四日

諭內閣

法司會問司昇等事內司聰原不是因打重身死
張延齡擅用官刑將聰絞死事已屢經訪問本內
又說事雖未至於有行此何言耶看來聶賢等也
只怪他不行于早爾卿等務依法擬票來看

嘉靖十二年九月十四日

臣張孚敬等謹題伏蒙發示法司會問張
延齡招由臣等已各將一得之愚恭進

聖覽伏望聖明亮察臣等之心非有他也欽蒙

聖諭云司聰原不是打重身死張延齡擅用官刑將
聰絞死聖明所聞委的是實延齡殺人之罪已

無疑矣又

諭云聶賢等說事雖未至於有行此何言耶臣等看得悖逆之事止論謀與不謀不論行與不行

聖明切責誠爲至當但招稱不曾親見延齡分付又叅稱家人異謀獄情可疑臣等未敢輕擬謹候聖明詳斷示下臣等乃敢擬票上 請謹具題 知

嘉靖十二年九月十四日

臣張孚敬謹 奏臣因張延齡事情不能積誠上悟 聖心罪當萬死萬死伏思他人可委之無言臣受 恩深重惟應死報

皇上視臣有手足之親 託臣以心膂之寄臣不盡
言以發機緘以明是非則臣負 恩之罪萬死
莫贖矣本月十一日伏蒙

聖諭云延齡 皇伯考懿親祇宜守分猶有餘乃包
藏禍心謀爲不軌是何道也并所奉

皇伯母傳諭錄示臣等作速議處因法司會同招詞
未成不敢輕議十四日伏蒙 發示會同招擬
臣反覆看得張延齡殺人罪狀已明誠不可宥
而謀逆之情未明故以一得之愚 上請非以
其真有逆情尚敢以 孝皇帝懿親請

皇上宥之也隨蒙 聖諭責臣以左右大臣必爲我
皇祖保天下以殺逆賊同姓尚處死况懿親乎臣伏
讀無任戰懼之至臣伏思

皇上欲察延齡逆情真與不真行法當與不當請自
今日在 朝人心觀之也夫延齡兄弟當

孝宗 武宗時朝士多相交往臣時雖未入仕竊嘗
聞之 武宗彌留之際

皇上迎繼 大統未至京師閣臣上託

昭聖皇太后懿旨拏人輒自處斷彼時威權內外已
震懼矣迨夫

皇上嗣統閣臣等輒敢以

皇上考 孝宗母 昭聖凡在 朝者靡不翕從

昭聖因自以有擁立之恩以子

皇上爲當然以致

聖母至京莫知所以接見之禮皆臣下謬妄之罪有

以誤 昭聖也彼時臣初爲進士未嘗受

皇上一命之寄

皇上亦未嘗識臣爲何如人臣只因見得道理之真

故敢以一人犯天下之怒幸賴

聖明在上裁決不然臣萬死無益也今 朝士恨臣

之心實未嘗一日肯忘每欲相時報復雖

昭聖皇太后之心恐亦未嘗一日忘臣者也嘗人有以斯言告臣者臣答之曰臣子事君惟盡此心之誠若夫成敗利鈍則在乎天而已臣自擔此心至死靡他也今者延齡情發臣觀內外大小臣工俱默默無言雖言官亦無敢言孰是孰非者何也實皆幸

皇上今有此舉以爲悉由議 大禮中來得

皇上誅滅延齡家俾 昭聖皇太后不得善終以深皇上之過以爲臣及獻夫陽爲解釋陰爲佐助以重

臣二人之罪莫遜於天下後世其設心如此而已特 聖明偶未之察耳臣連日伏思延齡殺人之罪誠不可宥

皇上卽殺之無得而議也其他如臣前議以處鶴齡或置之南京不得畱任京師以滋惑

仁壽宮之心臣之愚見盡忠於

皇上者不過如此夫亂臣賊子人人得而討之况臣爲左右大臣又受 恩深重者乎設使延齡真有逆謀而臣得見之真卽當首倡大議請加

天討而族滅之又敢爲之隱匿自甘爲叛逆之黨乎

臣詳招詞所稱曹祖鼓狀有曰天曹抱送六丁六甲及天神護伊之說皆涉妖言

皇上聰明天縱必能察悉孟軻氏曰行一不義殺一不辜而得天下有勿爲也而况謀逆之梟滅人族類臣於延齡此項梟狀實見得未真豈敢妄爲議擬無所可否而重爲

聖德之累乎臣又思

皇上此等訪據皆未知出於何人或彼一時不思干係國家憲典重大或出一時報復之私卒難收救

聖明亦必自加察臣又思前次退休山中

皇上召臣催敕內云自卿去後切軫朕思

聖母嗟問者亦數次矣臣伏讀書流涕哽咽臣思

皇上所以思臣

聖母所以數問臣者臣之心豈惟

皇上鑒之

聖母亦鑒之矣茲者 天眷 聖明誕生 皇嗣

國本綿長萬加喜慶或以臣言上聞

聖母亦必欲

皇上寬法以處延齡之家者也誠或不察真情必欲

斷成謀逆之獄則當如律行法族滅張氏矣
昭聖皇太后不知何以處之臣竊恐

皇上之心必有所不安

聖母之心亦所不安者矣臣承

聖明厚恩重託君臣一體休戚相同憂之也深故言
之也切慮之也遠故說也詳伏乞

聖明俯賜加察焉臣無任惶悚戰慄之至謹具奏聞

嘉靖十二年九月十七日

臣張孚放等謹題伏蒙發下法司會官議

擬張延齡臬狀一本臣等伏思此係生殺

大權臣等不敢輕擬伏乞

聖明裁斷施行

嘉靖十二年十月初 日

臣張孚敬等謹 題伏蒙 發下刑部等衙門

審錄重刑人犯一本臣等看得內馮恩秦瑄張
延齡三名所犯固法當處死但臣等於心竊有
所未安者不敢不言伏乞

聖明寬仁緩刑徐議處決臣等不勝懇悃所望之至
謹擬票上 請

嘉靖十二年十月二十七日題奉

聖日昨有旨催問因數正爲此三名速決卿堅欲回
護秦瑾馮恩且不論張延齡本該坐大逆條律
斬之已屈法甚如何執要不死不知留他怎麼
說宜明言之

臣張孚敬等謹題今日發下刑部等衙門
審錄重刑本臣等非敢爲馮恩等二名罪在可
宥但臣等反覆思維死者不可復生斷者不可
復續馮恩秦瑾情似可矜且二人俱係論臣等
臬過非賴

聖明聖察莫能係全今豈肯爲之回護惟

聖明鑒之又延齡殺人罪誠當死但

累朝之待親戚容有當議者故臣等均望 緩刑監

候徐議非敢有他也伏乞

聖明詳察施行

嘉靖十二年十月二十七日

臣張孚敬等謹 題今日午刻臣等伏見錦衣

衛一本爲究問郭宗臯事奉

聖旨既問明白若擊在午門前好生打四十棍放了

欽此臣等看得郭宗臯妄言奏擾情罪固爲可

惡今奉

旨著打四十天氣寒凍誠恐減命伏乞

聖慈寬減杖數著令爲民臣等不勝恐懼願望之至

謹具題請 旨

嘉靖十二年十月二十七日題奉

聖旨郭宗臯說目前拂意四字必探知朕曾諭內閣

說星變一事故曰拂意原是罪惡減命宜矣卿等

救宗臯只是爲其同耳本都爲張延齡夫延齡生

死無甚緊要只平日倚勢殺人心懷不道交納衆

多用錢厚結是以門對字樣皆文臣與作令卿等

徒知忠於

孝宗重爲 昭聖皇太后慮却不思甘同逆惡不忠
於

太祖卽前之議禮一般夫 皇伯母上配

皇伯考入我 皇祖之門外戚私親不干宮闈縱或
爲延齡憂傷亦是私耳卿孚敬曾曰恐傷

皇伯母之心夫 皇伯母如爲延齡傷心亦思爲

皇伯考傷心否此非朕過卿獻夫曰不知何人導陛
下爲此失德之事夫延齡以

母后親家却要篡位朕殺之法也義也分也何謂失
德今奈原告人被延齡錢買毒死也不追罪如何

又要不死怎麼謂之拂意非人臣宜此

臣張孚敬等謹題今日臣等冒昧以郭宗臯
事上請伏蒙

聖諭以及張延齡事情并諭示司馬光論薄昭事
宜臣等無任恐懼戰慄之至仰惟

皇上所論者祖宗之法也臣等夫復何言但臣等
之心實非有他也惟

聖明鑒之謹將原帖一紙繳進謹具題以聞

嘉靖十二年十月二十七日

臣張孚敬等謹奏為懇請緩刑慎獄以全

聖德事本年九月十一日伏蒙

聖諭令臣等作速議處延齡事情來聞臣等看得張延齡謀逆情狀未明不敢輕擬各以一得之愚

上陳伏蒙

聖諭切責無任惶懼臣等敬獻夫各受

恩深重自揣於心又不敢不盡其誠復各論奏伏蒙聖慈俯察已將延齡謀逆事情開釋令諸親多官議奏坐以殺人死辜本月二十七日蒙

發示刑部等衙門審錄重刑人犯一本該臣等具奏內馮恩秦瑄張延齡三名所犯固法當處死

但臣等於心竊有所安者不敢不言伏乞

聖明寬仁緩刑徐議處決等因欽奉

御批昨有旨催問囚數正爲此三名速決卿堅欲回護秦瑄馮恩且不論張延齡本該坐大逆條律斬之已屈法甚如何要執不死不知畱他怎麼說宜明言之欽此本日又該臣等回奏死者不可復生斷者不可復續馮恩秦瑄情似可矜且二人俱係論臣等罪非賴

聖明垂察莫能保全今豈肯爲之回護又張延齡殺人罪誠當死但累朝之待親戚容有當議者

故臣等均望 緩刑監候徐議非有他也等因
未奉 明示又本日該臣等具奏今日午刻伏
見錦衣衛一本為究聞郭宗臯事奉

聖旨既問明白著拏在午門前好生打四十棍放了
欽此臣等看得郭宗臯妄言奏擾情罪固為可
惡今奉 旨著打四十天氣寒凍誠恐減命伏
乞 聖慈寬減杖數著令為民等因欽奉

御批郭宗臯說目前拂意四字必探知朕曾諭內閣
說星變一事故曰拂意原其罪惡減命安矣卿等
救宗臯只是為其同耳本都為張延齡夫延齡生

死無甚緊要只平日倚勢殺人心懷不道交納衆
多用錢厚結是以門對字樣皆文臣與作今卿等
徒知忠於

孝宗重為 昭聖太后慮却不想甘同逆惡不忠於
太祖卽前之議禮一般夫 皇伯母上配

皇伯考入我 皇祖之門外戚私親不干宮闈縱或
為延齡憂傷亦是私耳卿乎敬曾曰恐傷

皇伯母之心夫 皇伯母如為延齡傷心不知亦思
為 皇伯考傷心否此非朕過卿獻夫曰不知何
人導陛下為此失德之事夫延齡以 母后親家

却要篡位朕殺之法也義也分也何謂失德今奈
原告人被延齡錢買毒死已不追罪如何又要不
死怎麼謂之拂意非人臣宜此欽此又蒙

錄示通鑑漢薄昭自殺一條并司馬光斷論臣等竊
思叨左右之臣受心膂之寄愚誠有未盡者敢
終默默竊見張延齡之臯法當議親馮因秦瑾
之罪情在可矜今一時能感回

聖心實臣等不能積誠所致不職之罪更復何辭又
古者成獄王三宥然後制刑慎重之至也臣等

仰惟

皇上好生之德如天地然今廷臣俱不能上體

聖心論輕重之序致其忠愛以盡之臣等之罪爲尤重也伏乞

聖明俯察臣等愚誠平生期於盡忠報主不敢誤君請於三人之罪更宜緩刑詳加審處不然切恐皇上他日靜思之餘不忍之心有時而發殆無及矣勿謂臣等今日勿盡言也爲此具本再申懇懇之誠臣等不勝恐懼待臯之至謹具奏聞

嘉靖十二年十月二十八日

臣張孚敬謹奏昨日臣等冒昧懇以緩刑張

延齡等愚誠上 請方恐懼待罪伏蒙

發下臣等所奏臣等益加恐懼夫生殺大權自天子出臣等惟盡其愚誠如此可否惟在

聖明俯察裁斷臣等又伏思前日欽承二次

御批詳切明盡如家人父子之相語無任感激又

御批令臣等宜明言之但一時倉卒未盡愚誠雖昨具奏亦未能盡敢再 上瀆音

大禮之議初興舉 朝臣工咸以恐傷

昭聖皇太后之心爲言臣等伏覩 禮成之後

皇上母事 昭聖 孝養聞于天下光于萬世矣茲

延齡罪過蒙 聖恩寬法處之止及一身殺之

誠法也臣等又竊念 國朝有議親之律誓暴

有免死之文今在 朝諸臣未加詳議

皇上固以 祖宗公法望於 昭聖而

昭聖恐未免昵於兄弟私情萬一有向隅之泣

皇上平時 孝養之心未免爲之感動在

聖母之心亦必有所不安者矣且恐天下之人莫能

家諭而戶曉也又馮恩秦瑋之奏原其設心誠

孔子所謂惡利口之覆邦家者而非仰賴

聖明在上其孰能察之置之重刑宜也臣等又竊念

皇上自議 大禮明大獄俱從 寬法未嘗肯殺

一人 天地好生之德也况馮恩係言官殺之

恐諍臣因而杜口將來姦宄人無敢言矣秦瑄

一儒士耳嘗作 大禮備辯實欲干進間有一

二已采入 明倫大典作論斷矣昔本求官今

乃滅命故臣等以二人之罪俱在可矜區區愚

誠惟此而已實非有他也夫疑臣勿任任臣勿

疑言使臣也忠臣不私私臣不忠言事君也臣

乎敬已嘗為

皇上陳之矣仰惟 聖明推赤心置人腹豈於臣等

復有疑耶臣等若不能開誠心布公道以報

皇上而復有私焉則非人類矣謹將原奏封進伏乞
聖明開發下法司再行會官詳擬奏請定奪臣等
不勝恐懼願望之至謹具奏以聞伏候

勅旨

嘉靖十二年十月二十九日

諭張元輔

今日又得卿等屢愛重囚煩奏自古強臣令君一
矣夫殺了張延齡張鶴齡必反此朕之待也卿等
畱延齡以伺亦好只是反覆說恐心傷

昭聖太后心此意朕實不覺不知是說朕欲傷

昭聖太后否如果是此等說就加罪在朕亦不過是
平日受恩於

太后家者報私背君耳如曰兄弟之情不知延齡殺
司聰如父子何恨司昇不是個人今

兩宮並尊一以奉養生身之親人人皆同矧又未曾
加重以報就如

世廟減一祭此朕不敢豐于禩之意可見矣延齡叛
國般般可證卽殺人用絞刑可類推矣只是事未
成故凡知道者皆必曰 天眷我

皇祖也凡懷二心受恩張門者皆曰恨不早圖設使
延齡幸不知 昭聖太后何居亦不知

昭聖太后曾思及否此甚道耶卿等怎麼又設大禮
人倫本然如今卿孚敬欲悔已以從廷和歟此本
要朕批卿等須自答朕止知殺人必以殺報

嘉靖十二年十月二十九日

臣張孚敬等謹 題臣等昨日冒昧二疏以緩
刑張延齡事情上 請伏蒙

聖諭切責臣等不勝恐懼戰慄之至仰惟

皇上 執者 祖宗大法也豈臣等之所敢預緣忝

係左右輔弼之臣受 國厚恩一得之愚不敢
不以上 聞以自盡此心而已伏惟

聖明諒察二疏既不蒙 俞允止可付該衙門知道
已之謹擬票上 請

嘉靖十二年十一月初一日

臣張孚敬等謹 奏臣等職忝輔導才識庸愚
常恐不能效忠報

主有負心簪之託前日冒昧連疏以緩刑張延齡馬
恩秦瑄三入事情上瀆 聖聽伏蒙

聖諭切責臣不勝恐懼自揣於心實由臣等平日不

能積誠盡職一時又煩詞 奏贖委爲有罪伏
蒙 聖恩不卽誅斥

特賜諭示諄切臣等益加愧懼連日跼蹐不寧伏望
皇上俯賜包容曲垂矜察臣等不勝戰慄感戴之至
謹具奏 聞

嘉靖十二年十一月初二日

諭張元輔

朕惟不嗜殺人者昌茲刑者九十四囚未免塞途
况 天有春生亦有秋肅而爲殺然本非有意而
殺也此者亦是自取亦非法所尋之也朕於近三

載俱停刑今歲生祥始兆雖朕德未庇嗣其實荷
天鑒眷欽戴何窮欲再罷之卿等但當承君之意勿
曰某某之幸實非爲亂賊而屈刑焉

嘉靖十二年十一月初十日

臣張李敬等謹題今日欽奉

聖旨暫罷行刑又伏蒙

聖諭云不嗜殺人者昌仰見

皇上好生之德如天高然真帝王之度也又

諭云今歲生祥始兆實荷天眷此正詩所謂燕及

皇天克昌厥後者也嗣此大慶豈有窮耶臣

等無任欽仰欣戴之至但臣等庸劣深懼無以
祇承 德意仰禪

聖化又豈敢爲小人幸實爲天下

宗社幸也臣等不勝欽仰欣戴之至謹具題以 聞

嘉靖十二年十一月初十日

跋

天下稱吾師羅山奏疏尚矣迺論張

皇親三言官者未入也賢嗣尚寶君一日出

示博受讀畢載拜稽首颺言曰明哉我

皇上之納諫婉哉吾師之進諫

主聖臣直用是益彰可爲天下萬世法迺知焚
草之論視補牘之見遠矣請梓諸廣示中
外

嘉靖庚戌春三月門生蒲坂楊博謹跋
跋

太師張文忠公遭遇奮庸相業烜赫夫人
所知也而其贊襄密勿與順幹旋則非夫
人所能知也余謝事次秦淮公之賢嗣符
臺君出示茲編屬一言於末簡旂伏讀而
嘆曰公公可謂忠矣公之心至是其曲盡矣

夫人臣之事君也猶事天也其格君也猶回天也感動轉移之機豈易乎哉公際

聖明諫行言聽真千載一時矣而是編所載則亦若不無吁咈於都兪之廷者此爲君之所以難而爲臣之所以不易也然終公之世而

上之所以霽威以從公者則亦既屢矣可見公積誠之所致而

天聰明之旁燭無私居高聽卑顧人臣之所以事之者何如於乎若公者豈易得哉

嘉靖丙辰夏五月晚學武進薛應旂謹跋

廣信府同知鄒 潘

推官方 重校正

臨江府推官袁長馭

上饒縣學教諭余學申對讀

湖州府後學吳仕旦覆訂

紀錄彙編卷之十終



疏 奏 齋 毅

著 鐸 查

毅齋經說

本館據涇川叢書
本排印初編各叢
書僅有此本

毅齋奏疏

請加意經筵疏

明 毅齋查 鐸著

題爲懇乞聖明加意經筵。以降聖學。以慰人心事。臣嘗觀成王之荅臣曰。日就月將。學有緝熙於光明。孟軻曰。一日暴之。十日寒之。未有能生者也。是人君之心。學則明。不學則蔽。學則生。不學則息。故聖君之自治。與賢臣之告君。未有不以學問爲急者。今之經筵。固皇上問學時也。近奉聖諭。於二月初九日講。十二日經筵。大小臣工。莫不延頸快視。以爲此聖學日新之始也。是日少有風雨。竟從中止。二十二日又止。昨初二日又止。一時人心。愴然自失。蓋自去冬十月輟講。至今二月始開。是一年之中。中止數月。一月之中。止數日耳。今又隨意輟止。是暴少寒多。豈日就月將之義乎。雖輟講數月。曠叢匪多。但天理難存。人心易放。况皇上處崇高之位。居深宮之中。接目觸心。無非可樂。所恃以節其流者。此問學耳。不與詩書禮義相親。則心必別有所嗜。不與仁賢碩輔相處。則情必別有所寄。出此人彼。間不容髮。君德之成否。政治之得失。實係於此。仰惟皇上聰明睿智。迥出尋常。乃於經筵。尙未加意。臣有以窺其微矣。蓋帝王之學。與韋布不同。故苟得旨趣。則嗜好自篤。徒循故套。則厭敷易生。臣嘗侍經筵。見講臣進講。未及移時。輔臣侍傍。惟塵默立。皇上肅然而臨。儼然而退。若有矜持之勞。未獲開悟之意。不過視爲故典。循往跡而舉行耳。宋儒謂

未見意趣。必不樂學。殆是之謂也。夫豈進講之初意哉。臣願自後講臣之講章。務因古人之遺訓。以發明今日之本心。從容朗誦。凝聚精誠。務以感格乎聖心。不在束縛於禮節。其有義理切要。人心幾微。講章所不能盡者。更容輔臣從容開導。各盡所見。我皇上至期必臨。虛心聽受。以諸臣之講說。務實體於身心。聽未及詳。不嫌間賜清問。講臣由心而發言。輔臣由心而啓沃。皇上由心而聽受。一堂之上。精神翕然。則講習久而義理自明。視聽專而心志自定。皇上雖欲罷而不能矣。其所關係。豈小小乎哉。倘不以臣言爲迂。大賜採納。加意體行。則臣等幸甚。天下幸甚。

舉才備用疏

題爲應明旨舉人才以備擢用事。臣惟國家之所重者在邊防。邊防之所急者在得人。恭惟皇上軫念邊圉。特允庭議。通行兩京九卿科道等官。各舉所知。具疏奏聞。以備簡用。此其留心人才。以爲安攘計者。誠至切也。臣待罪該科。義不容默。但人固難知。知人尤難。其得之訪問。未經親識者。不敢輕舉。以瀆天聽。謹以臣之所素知者。爲皇上陳之。原任兵部尙書巡撫雲南都御史呂光洵。學有淵源。才堪經濟。風猷夙著。于吳中反獄之囚徒。旋從殄滅。威信素孚于滇南。負固之叛賊。卒致就擒。文與武兼。才與誠合。此一人者。兵事素諳。精神尙健。所當及時效用者也。原任巡撫順天都御史溫景葵。博大之才。出之以細密。擬定之守。行之以變通。處權奸而從容折服。名素重于關中。禦黠寇而嚴肅隄防。望尤隆于冀北。此一臣者。輿論久屬。年力尙強。可備西北督撫之選者也。原任廣東按察司副使劉穩。賦性敏直。任事真誠。居兵曹幹理。

甚多。懋著勤勞之績。禦強寇艱難不避。卒收底定之功。此一臣者。昔惟養病。今已就痊。可備東西兵備之選者也。原任雲南布政司參政梅守德。慷慨不回之節。精敏有爲之才。居諫垣。行每恥于隨人。督學校。心尤勤于造士。諳練既久。盤錯尤宜。此一臣者。與臣同鄉。才望素著。年力正強。今養病已痊。可備東南有事之用者也。以上四臣。皆臣之得于親見。深知其人。如蒙勅下該部。再加酌議。如果臣言不謬。將呂光洵等。遇缺推用。以責其成。庶中外得人。邊郵自靖矣。

劾重臣欺妄疏

題爲督撫重臣。玩視明旨。大肆欺妄。懇乞聖旨嚴加究治。以飭邊防。以正國法事。臣近見兵部爲報寇入大同事。奉聖旨說與兵部近報寇兵已入大同邊內。你部裏便行與陳其學急發馬芳人馬。星夜前去。與同趙守併力截殺。不許沿習舊套。觀望逗遛。以致慢事。重罪不饒。欽此。臣伏覩皇上軫念邊防。惓惓勅諭。督撫諸臣。宜奮不顧身。克副明旨。一切欺肆舊習。宜黜之以圖實効。臣近見宣大山西等處總督陳其學。奏稱敵人分道繼入。親督諸將。戮力血戰。大挫其鋒。斬首八十餘級。要行分別將領之功。趙守尤宜首錄等情。又據大同巡撫李秋奏。同前事。據此則有功矣。及接巡按御史燕儒宦之奏。又稱趙守引兵觀望。相去五六十里。且將各堡精壯撤兵。致敵直入。大肆殺掠。東西二處。殺死人民不下三千餘人。殘破官堡不下百十餘處。并參陳其學李秋失事緣由。據此則又有罪焉。夫功之與罪。猶黑之與白。誰能掩之。今一則曰戮力血戰。一則曰撤兵逃躲。一則曰大挫賊鋒。一則曰隔遠觀望。一則曰斬彼首級八十餘顆。一則曰

殺死人民三千餘人。功罪異同。奏詞矛盾。似若難辨。然臣以理斷之。而是非立見。蓋儒宦同與事地方者。倘前功是實。必且樂爲之贊揚。苟非喪心病狂。決不肯枉其勞助。故爲捏說。以自取虛誑。且奏詞雖稱失事。而實意猶多曲全。在儒宦之心。亦有不得已而略爲之言者。况與勘之人。有副使方逢時在焉。有隨從各官在焉。破堡俱有實數。殺人俱有員名。則歷歷可據。事非風聞。詳明如此。更復何疑。儒宦乃按該方者。不信儒宦。又將誰信耶。其學等有罪無功。雖三尺童子。亦能分辨。况京師去大同不滿千里。殺人破堡。事非細微。誰能掩之。其學誠失事矣。使能引咎自歸。以圖後效。可也。縱不以爲過。或稱敵寇潛遯。可也。今以不可掩之事。乃公然變罪爲功。形之奏章。果涉曖昧。難於辨白耶。果居中深密。誤相聽從耶。果一聽趙崧之指揮。不復敢與查理耶。乃彼此掩護。且欲誇奇功。邀上賞。臣誠不知其何心也。夫事君之道。莫大于不欺。臣子之罪。亦莫大于欺。今其學之所爲。果欺乎。不欺乎。且趙崧與敵。旣未交一鋒。則彼八十餘顆首級。又不知從何而來。言之殊可痛心。夫崧誠稱一時名將。今聞敵自西來。乃復撤兵東去。蓋故爲牴牾。意在逃躲。不守大同之外。乃守應州之城。蓋先自潛藏。假言內護。不過假此以塞人之議論也。夫敵騎不滿萬餘。崧爲大將。不能發一矢。出一陣。以伸中國之威。乃巧於躲閃。又每欲借名自居。以爲得計。崧也如此。餘復何望哉。夫邊防一事。聖明積念。惓惓在此。一時諸臣經畫在此。天下人才掄選在此。國家錢糧盡輸在此。爲邊臣者。雖捐軀報效。尙恐不及。乃今以敗爲勝。以罪爲功。甘爲欺妄如此。此罪之所以當論也。且功罪不明。則人心無勸。况復明旨森嚴。猶且不顧如是。若過爲姑息。則習套愈深。人心愈玩。邊務愈弛。如國

法何。臣恐天下之大可慮者至矣。參看得總督陳其學。撫重鎮全非鎖鑰。視明旨真若弁髦。縱寇殃民。已極慘酷之狀。冒功邀賞。全無忌憚之心。罪已坐乎失機。心復安于罔上。巡撫李秋濫司撫巡之任。殊乏備禦之方。寇在門庭。不能發謀以制敵。殺人盈野。且欲冒功以欺人。奏稍近於含糊。事同歸於掩覆。總兵趙崙。巧於謀身。怯於禦敵。撤兵自衛。因致各堡之傷殘。望敵先藏。坐視居民之殺掠。八十餘顆之首級。何處得來。三千餘人之性命。誰爲賠償。罪有攸歸。法難輕貸。夫其學與秋。重臣也。趙崙。名將也。三人如此。餘復何言。伏望皇上。卽將御史燕儒官奏開失事人員。勅行該部。查照輕重。嚴加究治。庶人心警而邊防可飭。國法可正矣。

京營重務疏

題爲營議四出事終未妥。懇乞聖斷。毅然裁復。以裨軍國重務事。臣竊謂論國政者。當不徇乎人情。斷大事者。最畏避夫浮議。徇人情。卹浮議。卽細微之事。且未之可。况有關於軍國者乎。今營議紛紛。迄無成說。臣在旁觀。亦審矣。敢以始末爲皇上言之。彼京營一事。列聖迭有制度。先帝集其大成。有勳臣以爲之總度。有文臣以爲之協理。列爲三營。時其操練。誠一代不刊之盛典也。所未盡者。特以各營雖有副將。仍各練兵三千。若遊擊等官。然營中無一營總以統之。此處爲有間耳。輔臣貞吉。銳於有爲。憤其不振。以三營太混。五營爲詳。傑然建議。折三爲五。廷臣會議。謂三五詳略不遠。更置徒起弊端。未若仍乎三者之爲善也。夫旣不然乎貞吉之言。則當確循先皇之制。申明舊章。截然遵守可也。每營更立一營總可也。何事無

執持互爲兩可。意以貞吉輔臣也。議折五營矣。議營勳臣矣。今五營不可分。勳臣猶存舊。非情也。故三營則仍乎舊。勳臣若從其請。惟以一文臣提督之意。若似矣。何尋借臺臣一言。忽議三營之將。流官二人。勳臣又一人焉。以示其革與不革之意。夫吳繼爵且不能容曹邦輔矣。况能容二流官哉。不俟識者。知其必不能矣。流官旣去。悉爲勳臣。其相處誠一體矣。孰知以一勳臣。且議爲不可。况增而爲三乎。臣不知貞吉奏請之意何如。今日設施之意又何如。果爲練實兵伍之計乎。抑爲勳臣疏通之路乎。不圖實心練兵。且各具疏講禮。可慨也。夫事不詳其大意。徒強人以必從。設論雖多。人心愈遠。終日請旨。卒致難同。蓋論常禮。勳臣爲尊。使下於文人。豈能帖然心服。心志不同。欲事共濟。得乎。若論事權。文臣爲重。使後於勳臣。豈能如意施設。勢旣不能。欲事振舉。又可得乎。故度諸聖心。將欲重勳臣。不可也。將欲重文臣。亦不可也。兩大相形。勢難獨斷。事體至此。則先帝之制。與今日之事。其間善否。較然大明。惟始因徇情而未決。後見奉旨之太多。此所以迷而不復也。今邊境疲殘甚矣。所恃者。尙有此營兵在也。若復徇私情。漫爲遷就。畏浮議。忍於曲從。今日此一疏。則從此。明日彼一疏。則從彼。殊無畫一。僅類兒戲。如國計何。臣輾轉思維。非仍諸舊制。斷斷乎不可也。伏乞我皇上無懷已成之見。無拘屢變之嫌。以先皇舊制。斷然可行。今日之議。終屬未妥。擇勳臣爲總督。而體統尊。以文臣爲協贊。而事權定。更於三營設一正將。如有緩急。卽命統領大臣。以時嚴督之。科道以時巡視之。彼此之間。綱紀有序。真如身之使臂。臂之使指。不惟事體無妨。亦且占用稀少。今講禮且不給矣。况望實心以練兵乎。臣非不知成事不說也。但事關大計。故寧冒迂庸。不敢願

忌冒言之耳。惟聖明裁察焉。

乞留劉體乾疏

題爲懇乞聖明推念國計俯留大臣以慰人心事。臣等於本月十二日接到戶部尙書劉體乾奏爲乞恩認罪回話事。奉聖旨劉體乾累次抗旨着冠帶閑住。另推廉幹的來看。欽此。夫體乾大臣也。皇上輒去之。罪其抗也。人君之尊如天。使果於抗旨。卽置顯罰亦宜。况於去乎。旣無禮於君父。臣等卽擊去之亦宜。况有言乎。然體乾迹雖似抗。其心實有可原。蓋勢處其難。有萬不得已者。臣等待罪該科。義不容默。敢爲皇上陳之。今天下常賦歲不過二百四十萬。一歲所出至三百八十萬。是一歲所入較一歲所出尙少一百四十萬。此外雖有開納一節。然有無多寡不常。未敢定以爲額。况各處災傷屢請蠲免。卽今秋防宣大薊遼等鎮。請求迫急。無從措處。該部不過那前補後。扯東蓋西。歲捱一歲。幸其無事焉耳。萬一諸邊告警。京師戒嚴。旣無錢糧。安得兵馬。斯時將責之誰乎。體乾無一日不在慮者。故今九卿之官。惟戶部爲最難。乃羣臣所共知也。但於奉旨取用。不論年例應進。一概直諫。陳說其過。于固執則有之。實非敢於抗也。夫在皇上取用。亦多遲留。則在他處節省。可知有臣如此。亦能爲皇上善守財者也。不然。以皇上之財。供皇上之用。豈不欲承歡君父。願敢致皇上之怒如此哉。體乾去矣。卽使廉幹者繼之。臣恐巧婦亦不能炊無米之粥也。况事體繁難。惟熟練者方可支持。體乾諳歷有年。人心願留。以資國計。伏望皇上擴天地之量。推宥過之恩。俯允留用。則體乾得以圖報。而內外人心亦不勝忻慰矣。

請肅漕政疏

題爲運官故違明例遲誤運糧乞勅嚴究以肅漕政事。照得舊例運船限四月過淮七月抵灣四月無船無糧俱降級調任湖廣衛所糧斛限七月初一日完載在議單明例森嚴誰敢違之近據提督漕運鎮遠侯顧寰奏稱本年運船於六月十四江南江北十一總俱已過淮獨湖廣黃州衛指揮滿芳蘄州衛指揮李同春襄陽衛指揮謝九錫共船六十三隻未至又稱六月十五日據指揮陳美呈稱各衛運船造完尙有料銀未給十月十九日又據指揮滿芳呈稱改造新船尙未出水又稱據督糧右參議王謨押運新到儀真呈稱把總樂循禮尙在原籍九江戀住不行催趲等因臣等聞之不勝駭愕竊惟國家軍儲仰給漕運稍或違悞干係匪輕今據陳美之呈則屬無糧據滿芳之呈則屬無船彼此互異恐有抵飾猶難遽定若把總樂循禮戀家不行則王參議之呈可據也循禮職司督運又與各官不同正宜身先督率方可依期奏完乃今六月尙在私家則沿河阻凍寄囤勢所難免查得上年漂流阻凍不下五六十萬湖廣一總居多已經參題伏蒙聖恩寬宥然未有六月糧船尙未造完者樂循禮乃高坐不行催趲首先作俑法當參究看得湖廣把總樂循禮濫司督運專事營私當六月尙爾在家至七月豈能完報等國課如私貨任意遷延視明例若弁髦罔知遵守事屬故違法難輕貸況今各處運官絡繹到京正衆人矚目之時若止照常問罪何以振肅人心伏乞勅下該部轉行漕運衙門將樂循禮卽日提解來京監候員缺另行推補滿芳仍令戴罪催押陳美行巡按御史提解赴京一併參送法司嚴加究治庶幾人心知警臣等又據總

理河道翁都御史揭稱糧船已過開河者三千餘隻其餘俱在呂梁以下牽挽難施則違悞延遲恐不止樂循禮一人計今徂冬不過數月糧船尙未進開則阻凍寄圍如往年故事在所不免伏乞勅下該部轉行漕運提督衙門未進開者責令設法牽挽已進開者催趨晝夜前進若先期怠緩臨時止參運官塞責雖于人心少警終于國計有悞如有前弊容臣等訪實一體參究庶漕政不墮國儲有賴矣

乞採買金兩免作年例疏

題爲懇乞聖明軫念遠方暫議採買金兩免作年例以紓民力事近奉聖諭着雲南照隆慶元年例採買金三千兩年例金二千兩共五千兩每歲進用戶部知道欽此夫年例乃惟正之供採買則額外之征皇上節儉天成正供之外豈加輕征乃今金數倍增必因內帑缺乏故有此諭也但定爲年例則望皇上更加意焉臣等切惟天下皆皇上之財則皆惟皇上之用也然必定之以例者蓋國家制用無窮而天地生財有數故量其地之所產與其力之所堪定之以爲例每歲額辦庶上不病國下不病民此祖宗制賦之深意也金雖產於雲南地方不甚廣遠金礦亦無幾處故定爲年例一千兩然每歲徵解常不及期嘉靖年間亦常採買蓋間一行之未嘗以爲例也伏蒙皇上登極奉詔停止一時臣工莫不稱誦儉德然嘉靖四十五年奉旨採買金兩業已將完彼處官司苦於變價之難仍復解進該部查得已經奉詔停止因將前金准作節年拖欠及該年年例之數蓋亦徵解之難而曲爲之處也夫數止二千且徵解不前況五千乎間行採買且至遲延況每歲乎每歲增金三千兩則計其起派之數解運之需每歲須用銀三四萬兩

勢固甚難也。官旣難辦，不得不加派于民。該省遠在萬里之外，土夷雜處，民易爲亂。自鳳繼祖倡亂以來，盜賊充斥，每歲用兵，民力疲矣。若復加此額外之征，其何以堪。伏乞皇上軫念遠省，加意體恤。年例金每歲仍定二千兩，照常解進。如果缺用緊急，或令該省辦價開行採買，無以爲例。庶上用旣充，地方不困，小民幸甚。臣等幸甚。

嚴漕規以裕國計疏

題爲違悞運限，大壞漕規，懇乞聖明責成當事督臣，亟行區處，以裕國計事。近據漕運都御史趙孔昭奏：于七月內徐邳之間，河水盡決，淺阻運船千餘，計糧三十八萬，不能達洪。先該戶部侍郎陳紹儒題請寄囤，蓋逆知催僱不前，姑爲權宜計也。臣等切爲漕運國計所關，重務也。都御史趙孔昭、總兵顧寰同督漕運重臣也，總持法紀，恪守漕規，正其職掌，乃今違悞若此。伊誰之責耶。查得祖宗漕運原有欽限，恐遇洪水發，則限三月過淮，恐北寒阻凍，則限七月完納。上年漂流糧米不下數萬，天津阻凍糧船共有千餘，皆由過淮入閘之遲也。蓋自淮抵閘不及一月，洪水泛漲，多在夏末秋初，爲督臣者能鑒往歲之弊，嚴督監兌押運等官，依期過淮入閘，縱有洪水，安能爲害。乃今九月，何爲尙阻邳徐。據稱六七月間大雨時作，洪水瀾漫，牽曳無路，是矣。獨不思過淮欽限，原在何時。至今方行奏報，計今去阻凍之時尙有月餘，猶可催僱前進，豈可輒圖寄囤。若去年天津寄囤，今年邳下寄囤，歲復一歲，臣恐不數年間沿河上下悉爲寄囤之處，而京師百萬官軍不知從何仰給。且此例一開，奸頑官旗俱圖落後，千百弊端皆從此出，其漸誠不

可長也。使趙孔昭於去年阻凍官軍，嚴加究治。今歲必不至此。乃聽其寄囑回南，全未懲創。奸頑何由知警。至若顧寰，不惟莫能懲創，且漫爲之題請給銀，以市私恩。迹其所爲，是賞之使遲。又何恠乎今歲之違悞也。今日漕政之壞，顧寰當爲罪首。伏望皇上勅下該部，馬上差人，一面嚴督管河官員，將塞淤河道，速行開通。一面嚴督趙孔昭、顧寰，設法牽挽前進。務期抵灣完納。猶可少追其責。若竟從寄囑，徒假奏報塞責，則違悞之罪，更復何辭。容臣等指實參究。其他怠悞有司，奸頑官旗，卽令查照輕重，依法究治。不可姑待來年，仍致寬縱。庶旣往懲而將來知畏，法紀振而漕政舉矣。

先生自德安司理入爲刑科給事中，尋以不當新鄭意，出爲山西參議。其在諫垣，僅踰年耳。而章奏炳炳如是。迄今讀勸經筵，覈邊功，定營議，爭採買諸疏，正大光明。嘉謨入告，諒爲直節。當如是乎。然先生固猶是行之以危，行言孫之意也。先生答趙汝泉書云：頃蒙索諫草，足見一體之愛。自初入諫垣，欲效涓埃之報。邇來時世勢難直遂，徒言塞責，旣所恥爲。抗言招尤，亦所不敢。觀於此言，而先生之苦心可知。卽有明之時事，亦可知矣。嘉慶四年十二月，後學趙紹祖識。